

A Tx'an

YET IS CAB LIBROAL CHAM SAMUEL

Max yaben aj David yuj is camichal Saúl

1 ¹A yet max ayc'ay eb amalecita yuj David, max meltzotek cham cax max jayoc bay Siclag, cab c'ual max cancan bay tu'. ²Axa yet cabjial tu xin, max apni oc jun nak ach'ej petoj bay is campamento Saúl, toxa max tziltok is pichil ayocok, cax ay ajtok tx'otx' xol xil is jolom, yuj tx'oxon elok tol ay is cusc'ulal. A yet max apni oc bay satak David cax max ay nojanok. ³Max k'anlen David bay:

—¿Baytal petoj ach? ñi bay.

—Petoj in bay is campamento eb et israelal, toxac'al max in elajok, ñi nak.

⁴—¿Tzet max uj bay tu'? Al ayin, ñi David tu'.

—Mayal ayc'ay eb. Ay eb maxto elcanok, ay eb xin max cami. Max cam c'apax Saúl yetok Jonatán is c'ajol, ñi nak.

⁵—¿Tzet max yun ojtaknen elok tatol max cam Saúl yetok is c'ajol tu'? ñi David bay nak. ⁶Max tak'wi nak bay:

—C'uxanc'al ayin ec' bay Witz Gilboa cax max wiloni tol nojanxac'al ay Saúl yiban is lanza, cax tzunanxac'al yapni oc eb ajc'ul tu' yintak yetok is carruaje eb yet owal c'al is chej eb. ⁷A yet jun bek tu' cax max toj t'annaj yintak, max quin yilontek, max quin yawteni. ¿Tzet ñi mamin? quin chi bay. ⁸Cax max k'anlen ayin baytal titnak in. Max walon bay tol amalecita in. ⁹Cax max k'anon ayin tol chin jitz oc in ba is c'atan cax chin mak'on cam junelnej yaloni. Manak tu' caw wal iquisto, palta mayal oc pitz'an yailal yin c'ul. ¹⁰Yuj tu' max in jitztok in ba c'atan, cax max in mak'onxac'al camok yet c'am chi yab yail miman, yujtol max wila' t'inan ok camxac'al, yujtol mayal bek ay ba yiban txam is yespada. A yet max lajwi cam tu xin, cax max wion el is corona, c'al brazalete ayoc yin is k'ab, xan max witek ayach, mamin, ñi nak.

¹¹A yet max yaben David axca tu', max tzilontok is pichil yuj cusc'ulal, yetokc'al eb ajun yetok, ¹²cax max ok' eb yuj cusc'ulal yuj is camichal

Saúl yetok Jonatán is c'ajol, yujtol mayal c'apax ayc'ay eb soldado yet israel is conob Jehová, yuj eb filisteo. Majxac'al low eb yuj cusc'ulal masantac'al yet max k'ekbi ay yet jun c'ual tu'. ¹³Yinxa tzunanil max k'anlej David bay nak ach'ej max ion jay k'anej tu':

—¿Baytal aljinak ach? ñi bay nak.

—Ayin ti' c'ajol in jun amalecita cajan e xol ti', ñi nak.

¹⁴—¿Tzet yuj xan max a tec'baj a ba a mak'on cam jun mac sic'bil el yuj Jehová? ñi David tu'. ¹⁵Yet wal jun bek tu' cax max yawten jun is soldado:

—Mak' cam jun winak ti', ñi David tu' bay.

A wal yet jun bek tu' cax max low k'ab nak soldado tu' yin. ¹⁶A wal yet lanan mak'lay cam nak tu', max yalon David:

—Ach ay a mul xan chach cami. Ach max al aj a mul tol max a mak' cam cham rey sic'bil oc yuj Jehová, ñi David.

Bit yuj nalaytek Saúl c'al Jonatán

¹⁷Max bitnej David jun bit yet cusc'ulal yuj is nabaniltek Saúl c'al Jonatán is c'ajol, ¹⁸cax max chekon cuylay masanil eb Judá yin jun bit tu'. A jun bit tu' tz'ibbilcan ay yul libro yet Jaser:

¹⁹¡Ex wet israelal, ok'bal c'ulxac'al max yun yayc'ay co mayk'ak'al bay Witz Gilboa! ¡Ay... tzet xan wal max ayc'ay eb mimek winak yayji co xol!

²⁰Manchak e yalil jun tzet max uj tu' bay Gat, c'amc'al che yalil bay yulak calle bay Ascalón, yet watx' c'am chi tzaloj aj eb ix ix filisteo, yet c'am chi aj t'uknaj eb ix tx'ok conobal tu' yuj tzalojc'ulal.

²¹C'amxaokab chi ayc'ay nab c'al yal ak'bal yiban Witz Gilboa, tamwalokab chi ch'ib ixim trigo chi alay oc yin ofrendail bay tu', yujtol a bay tu' max tec'lay ay is makbal lanza eb nak is colomal israel caw wal tec'an. A bay tu' max lajwi jopopial yili is makbal lanza Saúl.

²²C'am bay toc'al max meltzoj Saúl c'al Jonatán yin owal yin tol maj bontok eb yespada c'al is julbal bay xol chiq'uul c'al is seboal eb ajc'ul tol miman yelapnok.

²³Ach Saúl c'al ach Jonatán, caw wal tol ochebil ex. Junejc'al e yayji yet iquis ex, cax junejc'al e yayji max ex cami. Caw wal jelan e yec'jab axca no tx'acbj, caw wal ay e yip yintak no coj.

²⁴Ex k'opojtak ix aj Israel, ok'anek yuj Saúl. Max ex pichlay yuj yetok cak k'ap c'al yetok lino caw wal watx', max yaoc oro yelbubok e pichil.

²⁵¡Ay... tzet xan wal max ayc'ay eb mimek winak bay max oc owal! Max mak'lay cam Jonatán bay jolomlak witz.

²⁶ Caw wal chi cus in c'ul oj, wuxtak Jonatán. C'amxa yalbanil jantak a watx'c'ulal max ak' ayin. Yelxac'al ec'ban max yun wochen a camc'ulal yintak camc'ulal junok ix ix.

²⁷ ¡Ay... tzet xan wal max cam eb nak mimek winak! ¡Masanil is mitx'k'ab eb nak ak'om owal max c'aylaycan elok! ñi David.

Max oc David reyalok Judá

2 ¹Max lajwi tu xin, cax max k'anlen cham David bay Jehová, max yalon axca ti':

—¿Tom chi je' in toj bay yul junok conob bay yul yet Judá? ñi. Max tak'wi Jehová bay:

—Chi je' a toji, ñi Cham.

Max k'anlen pax David:

—¿Baytal conobal chi je' in toji? ñi.

—A bay Hebrón chach toji, ñi Cham.

²Yuj tu xin, a tu' max toj David yetok eb ix yistzil cawanil, a ton Ahinoam aj Jezreel, yetok Abigail, yistzilben camom Nabal, aj Carmel. ³Cax max yion c'apaxtok eb nak ayic' yetok, yetok yetbi c'al yuninal. Max cajay eb bay yul conoblak yul yet Hebrón. ⁴Max lajwi yec'tok jayeb c'ual, cax max apni oc eb yicham winakil is tribual Judá cax max yaoncan oc eb David is reyalok.

Max yaben aj David tol a eb aj Jabes yul yet Galaad max mukon Saúl, ⁵xan max yatok juntzan eb is chekbej yuj yalon bay eb: Yak'okab Jehová is watx'c'ulal ayex, yuj tzet yetal tol watx' max e yun yin Saúl e reyal, yujtol max e muku'. ⁶Xajan ok ex yil Jehová yala', cax naan exc'al yuj, ac'ala' in ayin ti', xajan ok ex wila' yuj tzet yetal tol watx' max e yunej. ⁷Yuj tu xin, ayokab e tzalojc'ulal, c'amc'al chex xiwi, caxc'al max cam Saúl e reyal tu', palta a masanil eb anima bay Judá max in yaoc eb is reyalok, ñitok David.

Ocnak owal xol Israel yetok Judá

⁸A Abner is c'ajol Ner, yajaw yayji xol eb soldado Saúl. A max iontok Is-boset, is c'ajol Saúl bay Mahanaim. ⁹A bay tu' max yaoc yikbej yin reyalok Galaad, Aser, Jezreel, Efraín, c'al Benjamín, a ton bay masanil conob Israel. ¹⁰A yet max chaon el yich Is-boset yoc yajawilal bay israel ay cawinak abil is k'inal, cab abil max yak' reyal tu', palta a eb is tribual Judá mayal yaoc eb David yin reyal. ¹¹Caytu' max yun yoc David yin reyal bay Judá yin ukeb abil yetok wakeb xajaw. A yin jun tiempoal tu' a bay conob Hebrón max yak' yajawilal.

¹²Axa Abner xin, max el bay Mahanaim, max tojcan bay Gabaón yetok eb is soldado Is-boset. ¹³Axa Joab is yune' xal Sarvia, max eltok yetok eb is soldado David bay Hebrón, max chalen ba eb yetok Abner bay wajan a' aej yet Gabaón. A cab makan eb soldado tu' max ayji ec' eb bay wajan a' aej tu' jun makan bay jun pac', axa junxa makan bay jun pac'xa a'.

¹⁴Catatu' max yalon Abner bay Joab:

—Elokabtek jaywanok eb nak ach'ej yak'len owal co satak ti', xi.

—Yunokabi, xi Joab.

¹⁵Axca tu' max yun xin, lajanc'al bisil yet junjun max eltek, lajcawan eb yet Benjamín ayoc yetok Is-boset is c'ajol Saúl, lajcawan c'apax eb is chekbej David max eltek.

¹⁶Junjunc'al eb max mitx' jolom is yajc'ul tu' max jekontok eb yespada bay is tz'eyil yajc'ul tu', xan junejc'al max yun cam eb masanil. Yuj tu' xan a jun lugar ay bay yul yet Gabaón tu', max yikcan Lugar bay max oc Teklejail. ¹⁷Lajwi tu', caw wal miman max yun yoc owal yuj eb masanil. Axa Abner yetok eb is soldado max ayc'ay eb yuj eb soldado David. ¹⁸A bay tu' ayoc eb oxwan yune' xal Sarvia, a ton Joab, Abisay c'al Asael. A Asael tu' caw wal jalan bey axca junok no tx'ucchej. ¹⁹Jun bek max toj lemnaj yintak Abner, majxac'al elcan yintak. ²⁰A yet max yilontok Abner bay yintak, max aj yaw yaloni:

—Ma tol ach Asael ach, xi. Max tak'wi bay:

—Ayin toni, xi.

²¹Xan max yal Abner bay axca ti':

—Bekxa quin okteni, watx' tol a junok eb nak ach'ej ti' cha mitx'a', cax cheoncan masanil tzet yetal ibil oc yuj, xi bay.

Palta a Asael xin, maj yal c'ul max bek yukteni. ²²Max yalon pax Abner bay Asael junelxa:

—Manchakxa quin oktej, ¿ma chochej wal chin ak' pural ach wak'on camok? Axa chi yunej ¿tzetto wal chi yun in tec'ban in ba satak oxtak Joab? xi.

²³Palta a Asael xin, maj yal c'ul max el yintak, axa chucon eltok Abner teal is lanza yintak tu', palanc'al low yin is c'ul Asael tu', max k'axpoj elapnok te' bay yichin. Axac'al bay tu' max ayc'ay Asael tu' cami. A masanil eb chi apni oc bay jun lugar bay max cam Asael tu' chi oc waan eb yiloni. ²⁴Palta a Joab yetok Abisay max tojc'al eb yintak Abner. Axa wal toj c'u max apni oc eb bay jolom witz Ama, a tu' ay bay satak Gía, a ton bay chi tojcan beal tz'inan tx'otx' bay Gabaón. ²⁵A bay tu' max wajbaj oc ba eb yet is tribual Benjamín yetok Abner, junxanej max yut ba eb masanil bay jun tzalan. ²⁶Axa max yun xin, max awji Abner bay Joab axca ti':

—¿Tom man ok ach oc wanaj a mak'on cam anima ti'? ¿Tom c'am cha na' jabok tol asan yobc'ulal chi yitek jun ti' jiban? ¿Janic' ok al bay a soldado tol chi oc wanaj yukten yet conob? xi.

²⁷Max yalon Joab axca ti':

—Ti wal yojtak Dios, matawal maj ala' tol chi oc owal maj mi on tzaklojc'al e yintak yettax k'inibalil, xi bay.

²⁸Max lajwi tu' max yalon cham Joab tol chi xulay trompeta, xan max oc wanaj masanil eb soldado tzakloj yintak eb israel yin yak'on eb owal. ²⁹Caytu' max yun bey cham Abner yetok is soldado yet jun ak'bal tu' bay yac'alil Arabá, max k'axpoj ec'tok eb bay a' Jordán c'al yec'tok eb bay Bitrón masantac'al max apni oc eb bay Mahanaim.

³⁰Axa cham Joab xin, max bek tzakloj yintak cham Abner axa wajban oc is soldado tu', axa yet max yawten listail eb masanil, catatu' max il-layi tol ay 19 eb soldado yet David max cami, max cam c'apax Asael.

³¹Palta a eb is soldado David max mak' cam eb 360 eb soldado yet Benjamín, a ton eb soldado Abner.

³²Yinxac'al tzunanil max ilaytok is mimanil Asael bay Belén. A bay tu' max mukayi, a ton bay mukan is mam. A cham Joab yetokc'al masanil is soldado max bey eb masanil jun ak'bal tu', ayxa ec' eb bay Hebrón max k'inibi ajok.

3 ¹A eb ayc'alta' oc yetok eb yinatil Saúl caw wal najatil max yak' eb owal yetok eb ayoc yetok David, palta yak'ban axca tu' max ajc'al can yion yip eb yet David, axa pax eb ayc'al oc yetok yinatil Saúl xin, max ayc'ayc'al eb.

Is c'ajol David

(1 Cr 3.1-4)

²A eb c'ajol cham David max alji yet ayic' bay Hebrón, a ton eb ti': A jun babel, a ton Amnón is yune' xal Ahinoam, xal aj Jezreel. ³Axa jun yet is cab, a ton Quileab, yune' xal Abigail, xal yistzilben Nabal aj Carmel. Axa jun yet is yox, a ton Absalón yune' xal Maaca is cutz'in Talmi, reyal Gesur. ⁴Axa jun yet is can, a ton Adonías is yune' xal Haguit. Axa jun yet is so', a ton Sefatías, is yune' xal Abital. ⁵Axa jun yet is wak, a ton Itream, yune' xal Eglá a ton junok eb xal yistzil cham David. A ton juntzan eb is c'ajol ti' max alji yet ayic' cham bay Hebrón.

Ocnak cham Abner yetok David

⁶Yak'ban a owal lananc'al yajcan xol eb yet David yetok eb yican Saúl, a cham Abner junjunc'al c'u chi yic'al yip yiban eb yet Saúl tu'. ⁷A cham camom Saúl tu' ay junxa xal yistzil chi yik Rizpa, is cutz'in cham Aja. Ay jun c'ual max yal cham Is-boset bay cham Abner:

—¿Tzet yuj xan max ach way yetok jun xal yistzil camnak in mam? ñi bay.

⁸A yuj max yal Is-boset axca tu' xan caw wal max tit yowal cham Abner; yuj tu' max yal axca ti':

—¿Tom tx'i in chela', tokwal lanan waon oc in ba yetok eb ajc'ul yet Judá ti'? Ayin ti' caw wal watx'c'al max wut in ba bay Saúl, camnak a mam, bay masanil eb yican c'al bay eb yamigo, maj c'apax ach waoc yul k'ab David, ¿achxa chal tinani' tol max oc in mul yetok jun ix tu'? ⁹⁻¹⁰A Jehová max yak' is ti' bay David tol chi ilay ec' ikbej bay Saúl c'al bay eb yinatil, cax chi occan David tu' yin reyal bay israel, c'al bay Judá, chi tittac'al bay conob Dan masantac'al bay conob Beerseba. Titokab yowal c'ul Jehová wiban tatol c'am chi wak' wip yunen tzet max yal Cham tu', ñi Abner.

¹¹Caw wal majxa je' yalon Is-boset junokxa belan k'anej bay Abner yujtol caw wal chi xiw bay.

¹²Lajwi tu' max yaontok cham Abner k'anej bay cham David: Tokwal mayinnak ay wikbej bay yul jun nación ti'. A tinani' jak' junok co laj k'anej cax chin oc etok yin masanil bay jantak bay ok je' wuj masantac'al chi yal yoc masanil eb wet israelal etok, ñitok cham.

¹³Max paktzen cham David: Chi cha in c'ul chin watx'nej in trato etok, palta yowalil chojtaknejcan el jun k'anej ti': C'am chach jayoc in satak tatol c'am chetek ix Mical is cutz'in Saúl, ñitok David. ¹⁴Max yaon c'apaxtok cham David k'anej bay Is-boset, max yalon axca ti': Atek ix Mical, ix wistzil, a ton ix max wi' yuj max wak' 100 jolom is winakil eb filisteo yuj tojolok ix bay a mam, ñitok cham.

¹⁵Xan max yal Is-boset, tol chi ilay ec' xal bay Paltiel, is c'ajol Lais, a ton jun tu' is yichamil xal yayji oco. ¹⁶Axa Paltiel xin, max toj yintak xal, chi ok'i, masantac'al max apni oc bay Bahurim. A bay tu' max yal cham Abner bay Paltiel tol chi meltzojcan bay tu'. Caytu' max yun meltzoji.

¹⁷Axa yin c'ojanc'ulalil max k'anjab cham Abner yetok eb yicham winakil is tribual israel, max yalon bay eb axca ti': Ayxa tiempool max e na ayex ti' tol a cham David chi oc e reyalok. ¹⁸A tinani' xin, mayal apni tiempool yet chi oqui, yujtol a Jehová max yak' is ti' tol a yuj cham David tu' ok col is conob bay yul k'ab eb filisteo, c'al bay yul k'ab masanil juntzan eb ajc'ul oc jin, ñi cham Abner.

¹⁹Max k'anjab c'apax cham Abner yetok masanil eb yet Benjaminal, lajwi tu xin, max toj bay Hebrón k'anjab yetok cham David yuj tzet max yal eb yet israelal eb, c'al tzet max yal masanil eb yet Benjaminal. ²⁰Max apni oc yetok junc'alwan winak bay Hebrón, bay ayic' cham David. Caytu' max yun chekon watx'jok cham David jun miman loj yuj Abner c'al yuj eb ajun yetok. ²¹Lajwi tu' max yalon cham Abner bay cham David:

A tinani' mamin rey, yowalil chin toj in wajbaj masanil eb jet israelal, yet chi watx'nej eb junok trato etok, caywal tu' ok yun ak'on yajawil axca wal chi yochej a c'ul, ñi Abner.

—Asi' xin, ñi cham David bay Abner. Axa toj yin tzalojc'ulalil tu'.

Camichal Abner yuj Joab

²²A yet jun bek tu' max apni oc Joab yetokc'al eb is soldado David, max betic' eb yin junok owal. Caw wal miman tzet yetal ibil oc yuj eb, a ton max bet yican ec' eb bay eb ajc'ul. Palta a Abner xin, c'amxa ec' yetok David bay Hebrón, yujtol mayal yal toj ba yin tzalojc'ulal bay cham David tu'. ²³A yet max apni oc cham Joab yetok masanil eb soldado ajun yetok, max al-lay bay tol a Abner c'ajol Ner max ayji ec' yetok cham rey, axa tinani' xin, mayal chalay meltzoj yuj cham rey yin tzalojc'ulal. ²⁴Lajwi tu' max toj cham Joab bay cham rey, max yaloni:

—¿Tzet yetal max on, mamin rey? A Abner max ach ul ilonok, cax max a cha meltzoj toj yin cac'al tu'. ²⁵¿Tom man ojtakok mamin rey, tol a jun Abner tu' toc'al chi ul yiaytek a sat yak'ban chi yila' tzetak chonej c'al tzetbil ayji? ñi Joab.

²⁶Asanc'al yet max lajwi k'anjab Joab yetok cham rey David, max chekon cham Joab tu' toj saylay Abner, yin tol man yojtakok cham rey David, ata tu' max bet yi' meltzoy eb chekbej Joab tu' bay a' uc'bala' yet Sira. ²⁷A yet max apni oc Abner bay Hebrón, a Joab max iontok bay jun pac' tz'eyil puertail conob, yet chi k'anjab yetok tx'oklil. A bay tu' max jektok ch'en espada yin is c'ul, cax max cami, yuj paktzen camichal Asael is yux'tak Joab tu' bay. ²⁸Max lajwi tu xin yin, c'ojanc'ulalil max yabaj cham rey David, max yaloni: A satak Jehová ayin ti' yetokc'al masanil eb in chekbej c'am co mul max oc yin is camichal Abner, is c'ajol Ner. ²⁹Ayokab c'ay jun ti' yiban Joab yetokc'al yiban eb yican c'al yinatil. A bay xol eb tu' ayokabc'al mac ok yab yail yin tol ay tzet chi el yin is mimanil, ma ayokab c'apax mac ya'ay yuj lepra, ayokab mac ok ay beyi, ma ayokab mac ok mak'lay camok c'al mac ok yab yail wajil, xi David.

³⁰A Joab c'al Abisai max mak'on cam Abner, yujtol a yet max oc owal bay Gabaón, a Abner tu' max mak'on cam yux'tak eb.

³¹Max lajwi tu xin, max yalon cham rey David bay Joab c'al bay masanil eb ajun yetok, tol chi tziltok eb pichil c'al pichon ba eb yetok el pichilej, cax chi oc eb yin cusc'ulal yuj is camichal Abner. Axa cham rey David xin, max oc tzakan yintak mac max batxontok mimanil Abner. ³²Max mukon eb is mimanil Abner bay Hebrón. A bay tu' max ok' cham rey yuj Abner bay max mukay tu', max ok' c'apax masanil eb anima ajun yetok, ³³xan max bitnej cham rey jun cusc'ulal ti' axca ti':

¿Tzet yuj xan caytu' max yun a cam ach Abner, axca chi yun cam eb yobtakwom?

³⁴Tokwal c'alan a k'ab, tamwal c'alan akan yetok cadena. ¡Axcaxac'al chi yun cam eb anima yul k'ab eb anima yob nabal, caytu' max yun a cami! xi cham David.

Axa eb anima xin, max ok'c'al eb yuj is camichal Abner.

³⁵Lajwi tu' max tewi oc eb yin cham David tol chi low jabok yet c'amto chi ay c'u, palta max yak' cham is ti' satak Dios:

—¡Aokab Cham chi aon oc yailal wiban tatol chi wablej jabok loj ma junokxa tzet yetal yet c'amto chi toj c'u! xi.

³⁶Masanil anima ayic' bay tu' max nachaj el jun ti' yuj eb, caw wal max cha c'ul eb, yujtol a masanil tzet chi yun David chi chac'al c'ul eb masanil. ³⁷A yet jun c'ual tu' max nachaj el yuj eb israel tu' masanil tol a cham rey David c'am wal jabok yoc yin is camichal Abner, is c'ajol Ner.

³⁸Max lajwi tu' max yalon cham rey bay masanil eb is chekbej:

—Ayex ti', ti' wal e yojtak e masanil tol mayal cam jun sat yajaw co xol aon israel on ti'. ³⁹Yuj tu' xan caxc'al a Dios max quin sic'on oc yin reyal, palta caw wal chi pax wip chi wabej yuj yobc'ulalil eb yune' xal Sarvia. Aokab Jehová ok paktzen bay jun max unen jun yobtakil ti', xi cham.

Camichal cham Is-boset

4 ¹A yet max yaben Is-boset, is c'ajol Saúl, tol mayal cam Abner bay Hebrón, max paxxac'al yip junelnej, yuj xiwilal; caw wal max xiw c'apax aj masanil eb yet israelal yuj. ²Ay cawan is chekbej Is-boset yajaw yayji eb yin jun bulan soldado elk'om. Ay jun chi yik Baana, axa junxa xin, chi yik Recab. A eb tu' is c'ajol Rimón cajan bay Beerot yul is makbej tribual Benjamín. (A yinatil eb anima cajaynak bay Beerot chi al-layi tol yinatil Benjamín eb. ³Asan tol max elaj eb max tojcan eb bay Gitaim, a ton bay tu' ayic' eb yin ec'jabwomc'al.)

⁴(A Jonatán is c'ajol Saúl ay jun is c'ajol chi yik Mefi-boset. A jun ti' man watx'ok is yakan cabil. A yet oyebxa abil jun Mefi-boset tu', max tit yabixal bay Jezreel tol a Saúl yetok Jonatán mayal cam eb, xan max ilay aj Mefi-boset yuj jun ix chi ilon ch'ibok, cax max toj eb elaj yaloni. Yujtol max yak' yip yelajok, max bekon ay ix, caytu' max yun yetaxcan el yakan.)

⁵A Recab c'al Baana tu', max toj eb bay yatut Is-boset. Chuman wal c'u, lanan chi way bay is tx'at yet chi xew janic'ok. ⁶Axa pax ix taynem ti' puerta xin, c'uxanc'al aytok ix xuoq trigo, axa max yunajok, max wayaj ix bay tu', a wal yet tu' max octok Recab yetok yuʔtak bay chi way Is-boset yin tol c'am junok mac max iloni. ⁷A yet max octok eb bay yul na tu', max yilon eb tol telan aj Is-boset way bay is tx'at. Caytu' max yun mak'on cam eb, max tzoc'on el eb is jolom, max yiontok eb yetok. Max bey eb masanil ak'bal bay chi toj beal Arabá ⁸yet chi toj yak'on eb bay cham rey David; a tu' ayic' cham bay Hebrón. Max yalon eb bay axca ti':

—Mamin rey, max jitek is jolom Is-boset is c'ajol Saúl, cham ajc'ul oc en tol max yochej max ach mak' camok. Palta a tinani' max el yin c'ul Jehová yak'on ayach yin a pakon a ba yin Saúl c'al yin yinatil, ʔi eb.

⁹Max tak'wi cham rey David tu' bay eb:

—Chi waoc Jehová Cham max in colon el bay masanil in bilc'ulal in testigook tol ¹⁰a yet max jayoc jun winak bay Siclag yet max yiontek watx' abix ayin yaloni, a ton yuj is camichal Saúl, max in chek mitx'layok, max mak'lay camok. A ton wal paktzebal max wak' bay tu' yuj jun watx' abix max yitek ayin tu'. ¹¹Yuj tu' xan caywal tu' ok wun c'apax e yetok ayex ti'. Caw wal yob ex ayex ti', max e mak' cam jun winak tol c'am is mul yak'ban chi way bay yatut. Yuj wal tu' ok in paktzej wal is camichal tu' ayex. Junelnej ok wak' c'ayil e binaj bay yulyibank'inal ti', ʔi cham.

¹²Max lajwi tu xin, max chekon cham rey eb is soldado tol chi mak'lay cam eb, max tzoc'lay el k'ab eb c'al yakan eb, cax max aj locan is mimanil eb bay wajan a' aej bay Hebrón. Lajwi tu' max yiontok eb soldado is jolom Is-boset max mukon eb bay mukan Abner, bay Hebrón tu'.

Ocnak David reyalok Israel c'al Judá

(1 Cr 11.1-3)

5 ¹Max lajwi tu' cax max bet masanil eb is tribual israel k'anjab yetok David bay Hebrón. Max yalon eb: Ayon ti' aontoc'al oc etok. ²Caxc'al tol yel a Saúl max oc co reyalok, palta ach max ak' wal ep on ekban yin owal. Ac'ala' junxa, a Jehová max aloni tol ach ok on ekbaj, c'al oc yin reyal jin on bay co conobal ti', xi eb.

³Max betic' eb yicham winakil conob israel k'anjab yetok David bay Hebrón yuj watx'nencan eb is trato yetok, cax max yaoncan oc eb Jehová yin testigoal yin is trato eb tu'. Caytu' max yun yoccan David tu' yin reyalilok israel. ⁴30 abil is k'inal David tu' cax max chaon el yich yoc yin reyal, cax cawinak abil max yak' reyal. ⁵Nan is waxakeb abil max yak' reyal bay Hebrón yiban eb anima aj Judá. Max lajwi tu', max yak'on reyal yiban conob Israel yetok Judá yin 33 abil bay Jerusalén.

Yayc'aybal conob Sión yuj David

(1 Cr 11.4-9)

⁶A yet jun c'ual max wajbaj oc rey David eb soldado yuj yak'on owal yin eb jebuseo ay bay Jerusalén. Yujtol max na eb jebuseo tu' tol maj je' yoc David yul is conobal eb tu', yuj tu' xan max yal eb: Ach ti' maj je' octek cayti'. A eb c'am chi je' yilwani c'al eb chi ay beyi, man ok ach chaon octek cayti', xi eb. ⁷Palta maxax ayc'ay conob Sión yuj, xan a jun tu' chi yik Conob David tinani'. ⁸A yet jun el tu' max yal David bay eb is soldado: Mac chi chaon el yich owal yetok eb jebuseo, ocokabtok bay yul olan bay chi ca toj a' aej chi ocapnok bay yul conob, cax chi mak'on cam masanil eb c'am chi je' yilwani c'al eb chi ay beyi. A wal juntzan eb tu' caw wal chin yaj eb, xi. A tu' elnaktek jun k'anej chi ali: A eb c'am chi je' yilwi c'al eb chi ay beyi c'am chi je' yoctok eb yul na, xi. ⁹Max lajwi tu' cax max watx'nen aj David is cuartel bay jun conob tu', max yak'on yik Conob David, cax max bic'ojc'al watx'nen aj nalak yinlak, chi tojtac'al bay Milo. ¹⁰A Jehová Dios Cham Yajaw yin Masanil, a' ayoc yetok David, xan yelxac'al max aj can mimanbilal.

A Hiram max yatok is chekbej bay David

(1 Cr 14.1-2)

¹¹A Hiram reyal Tiro max chektok mulnajwom bay, yetok juntzan eb josom te' c'al yetok eb mak'om poj ch'en, ibil oc te c'ute' yuj eb, cax max watx'nen aj eb is yatut David. ¹²Caytu' max yun nachaj el yuj David tol a wal caw Jehová max aon oc yin reyal yiban conob Israel, max aj wal can is yikbej yujtol caw wal ochebil conob Israel yuj Jehová.

Juntzanxa is c'ajol David*(1 Cr 3.5-9; 14.3-7)*

¹³Max lajwi yel David bay Hebrón cax max apnican oc bay Jerusalén, aytoc'al eb ix ix max yi' yistzilok, xan xiwiltoc'al yuninal yetok eb ix.

¹⁴A eb is c'ajol max alji bay Jerusalén tu' a ton: Samúa, Sobab, Natán, Salomón, ¹⁵Ibhar, Elisúa, Nefec, Jaffa, ¹⁶Elisama, Eliada c'al yetok Elifelet.

Yayc'aybal eb filisteo yuj David*(1 Cr 14.8-17)*

¹⁷A yet max yaben eb filisteo tol mayal oc David yin reyalok israel, max aj nilnaj eb toj yin David, palta max yab cham xan max toj col ba satlak ch'en. ¹⁸Yelc'ulalxac'al chi apni oc eb filisteo watx'nen ay is campamento bay jobeal Refaim. ¹⁹Yuj wal tu' xan max k'anlej David bay Jehová axca ti':

—¿Chi mi je' wak'on owal yetok eb filisteo? ¿Chi mi wal aoc eb yul in k'ab? xi rey David bay Jehová.

Max tak'wi Jehová bay:

—Asi', ak' owal yetok eb. Ayin ok waoc eb yul a k'ab, xi Cham.

²⁰Max apni oc David yetok eb is soldado bay Baal-perazim. A bay tu' max ayc'ay eb filisteo yuj. Yuj tu' xan max yala': Max pojtok Jehová jun be xol eb wajc'ul ti', axca wal chi yun toj tobnaj junok elom aej, xi David. Yuj tu' xan Baal-perazim max yikcan jun lugar tu'. ²¹A yet max elaj eb filisteo, max bekoncan bulan eb is diosal, axa David yetok eb ajun yetok, max ec' iontok.

²²Max apni pax eb filisteo bay jobeal Refaim junelxa. ²³Yuj tu' xan max k'anlej pax rey David bay Jehová, max yalon Jehová bay:

—Manchak ach oc bay satak eb, palta yintak eb chach tita. A tu' chach apni oc bay ay xiwil te bálamo. ²⁴A yet ok aben bil yec' xolak k'ablak te te' tu', cax chach oc yin eb yin aymanil, yujtol ayin ok in babjok a satak, cax ayin ok in mak' cam eb filisteo tu', xi Jehová.

²⁵Max yikej rey David bay max yal Jehová. Yuj tu' xan max ayc'ay eb filisteo yuj, max chatoktac'al bay Gabaón masantac'al bay Gezer.

Yinaktek David cañail trato Jehová bay Jerusalén yaloni*(1 Cr 13.5-14)*

6 ¹Max wajban oc rey David eb soldado caw wal tol jelan bay xol eb israel, ay 30,000 eb. ²Max toj bay Baala yul yet Judá, tzakan oc masanil is soldado tu' yintak. Max naon q'uexon bay aycan is cañail trato Jehová Dios, Cham Yajaw yin Masanil, a ton caña bay chi binaj Jehová, Cham ayoc yiban eb querubín. ³A bay yul yatut Abinadab, ay ajtok bay jun tzalan, a bay tu' ay is cañail trato tu'. A yiban jun carreta caw wal ac', a tu' max yitek eb te caña tu'. ⁴A cawan is c'ajol Abinadab, a ton Uza c'al Ahío, a eb chi ikban te carreta bay ay ajtok te', a Ahío babel satak. ⁵Axa David yetok masanil eb conob Israel,

yetok wal masanil is c'ul eb chi bitni eb c'al yaj t'uklabok eb canalwi satak Jehová yak'ban chi oc arpa c'al salterio, panderos, castañuelas c'al platillo. ⁶A yet max apni oc eb yetok is cañail trato Dios bay is tec'bal trigo Nacón, cax max yaon oc Uza tu' is k'ab yin te caña tu' yaloni, yujtol max telc'ohtok no buey tok'nej oc te carreta tu'. ⁷Xan max tit yowal Jehová yuj max toj lacnaj Uza tu' yin te caña tu', yuj tu' max camxac'al bay c'atan te caña tu'.

⁸Max tit yowal David yujtol max mak'lay cam Uza yuj Jehová, yuj tu' xan max yikcan jun lugar tu' Pérez-uza yuj, ac'ala' axca tu' bi tinani'. ⁹A yet jun c'ual tu' max xiwcan aj rey David satak Jehová. Yuj tu' xan max yal David: ¿Tzet xan okto witok te cañail trato yet Jehová bay cajan in? ¹⁰Max naon ba c'ul David, majxac'al yitok te caña tu' bay is conob. Yuj tu' xan max yala' tol chi ilaycantok te' bay yatut Obed-edom aj Gat. ¹¹Oxeb xajaw max can te' bay tu', caw wal max yak' Jehová is watx'c'ulal yiban Obed-edom yetokc'al eb cajan yetok bay yatut.

Max yitek David cañail trato bay Jerusalén

(1 Cr 15.1—16.6)

¹²A yet max al-lay bay rey David tol yuj te cañail trato Jehová xan ay yaxilal yiban Obed-edom yetok eb cajan yul yatut, c'al yetok masanil tzetak yetal ay bay, yuj tu' xan max toj yitek. Caw wal max tzaloji, max yiontek bay yul is conob. ¹³A yet max c'oli bey toj eb inej oc te caña tu' janic', cax max yak'on David jun no toro c'al jun no calnel bak'ech yin xajanbalil bay Jehová.

¹⁴A jun pichilej yet sacerdote naba lino ayoc yuj David, cax max aj t'uknaj canalwi yetok masanil is c'ul satak Jehová. ¹⁵Axca ton tu' max yun David yetok masanil conob Israel. Mimek k'in max cha eb yet max yiontek eb te cañail trato tu' bay Jerusalén, chi xulay trompeta c'al aw yet tzalojc'ulal.

¹⁶A yet max apni oc te cañail trato yet Jehová tu' bay conob David, t'anan eltek xal Mical is cutz'in Saúl bay yul wentena, max yiloni tol a rey David toxc'a chi aj t'uknaj canalwi satak Jehová, cax max intaknelay el cham yuj xal.

¹⁷A yet max apni oc te cañail trato tu' yuj eb, cax max ilaytek bay yul jun mantiado watx'nebil yuj rey David. Max lajwi tu' cax max chekon David tu' yak'lay xajanbal tol chi ak'lay tz'aok, c'al xajanbal yet junc'ulalil yetok Jehová. ¹⁸A yet max lajwi yak'lay xajanbal tu', cax max yalon watx' k'anej yiban conob Israel yin bi Jehová Cham Yajaw yin Masanil. ¹⁹A jantak israel wajan ec' bay tu', eb winak c'al eb ix, max ak'lay junjun ixim pan bay eb, yetok jabjab bolbil chibej c'al takin uva. Max lajwi tu xin, cax max meltzoj eb bay yatut.

²⁰Ac'ala' c'apax rey David max meltzoj bay yatut yuj yalon watx' k'anej yiban eb cajan bay yatut. Max eltek xal Mical is yistzil ul chaoni, max yalon xal:

—A tinani' watx'xac'al mi max ot a ba ach reyal israel. Max a tx'oxxac'al el a ba satak eb ix is chekbej eb nak chi mulnaj etok. Q'uixwiltakxac'al max ot a ba axcac'al junok comon anima, ²¹xi xal.

²¹Cax max tak'wi David:

—Wal yel max in canalwi, palta satak Jehová, yujtol a Cham max in sic'on oc yin yajawilalok conob is q'uexelok a mam c'al q'uexelok eb a nuej. Yuj tu' xan ok in canalwoc'al bay satak Jehová. ²²Toltax chi je' wion ay in ba janic'okxa, cax chi el in q'uixwil axca alon tu', palta a eb ix ix chal tu', miman welapnok yul sat eb ix, xi rey David tu'.

²³Axa xal Mical, cutz'in Saúl, c'amxac'al junok yune' max yila'.

Is trato Jehová yetok rey David

(1 Cr 17.1-27)

7 ¹A yet max octok rey David bay yul is yatut, yet mayal yaoc Jehová junc'ulal xol David tu' yetok eb ajc'ul oyan oc yinlak, ²max yalon cham bay Natán is chekbej Jehová:

—Ti wal ojtak tol yinc'al tzalojc'ulalil chi yun woctok bay yul watut, bay naba c'ute' ayoc yin, axa pax te cañail trato yet Dios xin, asanc'al yul mantiado ayoctok, xi rey David.

³Yuj tu' xan max yal Natán:

—Yunokabc'al bay chi cha a c'ul, yujtol chi colwajc'al Jehová etok, xi Natán.

⁴A yet jun ak'bal tu' max k'anjab Jehová bay Natán: ⁵Así!, k'anjaban yetok in chekbej David tu', cax chaloni tol ayin Jehová in ti' chi wala': ¿Tom ok a watx'nej aj junok templo bay ok in ayjok? ⁶Yettaxc'al max ex wíelték ayex israel ex ti' bay Egipto masantac'al tinani', c'amc'al bay max in ayji yul junok na. Ilab tol asanc'al yul mantiado ayin. ⁷Yet max in beyc'alték, c'am junelok max in k'an bay eb anima max wac'al oc yin yicham winakilok e conob junok templo tol naba c'ute' ayoc yin bay chin ayji, cachi bay. ⁸Al c'apax bay: Ayin Jehová Yajaw in yin masanil chi wala': Ayin max ach wíel yin iloj calnel cax max ach waon oc yajawilok in conob israel. ⁹Tzanc'al bay chach eq'ui ayinc'al oc etok. Max in c'ayil masanil eb ajc'ul oc en, cax max wion aj can a mimanbilal axca eb mimek winak bay yulyibank'inal ti'. ¹⁰Yetok c'apaxok, max wak' jun e tx'otx' bay ok ex ayjok ayex in conob ex ti'. C'amxa mac ok ex ion elok; c'amxa ajc'ul ok ex etnenok axca max yun beyc'alték tiempo ti', ¹¹yet max waon oc eb yicham winakil conob tu' yilomalok in conob. Caw wal c'amxa tzet ok a na', c'amxa mac ajc'ul oc en. Cax chi walon abej tol ayc'al enatil ok occ'al yin reyal. ¹²Axa yet ok ajapnok tiempoal a cam xin, ayin ok wacan oc junok a c'ajol a q'uexelok yin reyal, cax ok waoncan oc masanil yul is k'ab. ¹³A junok ok waoc tu', a' ok watx'nen aj in templo, cax ok waonc'al oc jun ikbej ti' yul k'ab is yinatil yin tojbalk'inal. ¹⁴Tol is mam nak ok wunej, cax in c'ajol ok yun nak. Ta ay bay ok oc is mul, ok waoc yailal yin axca wal chi yun yalay oc yailal yin tzanc'al mac chi oc is yobtakil. ¹⁵Palta caw wal man ok wíel in camc'ulal yin nak tu', man axcaok max yun wion el in camc'ulal yin Saúl, xan max wíel yin yopiso yuj ach waoncan oc q'uexelok. ¹⁶Ayin ok wak'c'al beytok ikbej yin enatil yin tojbalk'inal, xi wal Jehová, cachi bay, xi Cham.

¹⁷Axca wal max yun yalon Jehová, axca tu' max yun yalon Natán bay cham rey David. ¹⁸A yet max yaben cham jun k'anej tu', max oc ijan yalon bay Jehová: Mamin Jehová, tok ay wal jabok welapnok tamwal ay yelapnok eb wichmam. ¿Mac in txel xin xan miman ikbej mayal ak' ayin? ¹⁹¿Tom txennej wal yayji oc jun ti' cha na' Mamin Jehová, yuj tu' xan max ala' tzet ok yun yel oc winatil yet bak'in? Tok wal axca beybal eb anima a beybal ti'. ²⁰¿Tzetto wal junokxa chin teyej wal a satak Mamin Jehová? Ach ti' ojtak tzetbil yayji oc in nabal ayin a chekbej in ti'. ²¹Masanil tzet yetal tol c'ayubtakxac'al yoqui, asannej ach chonej atac'ala' bay chochej, cax chak'on wojtaknej elok. ²²Yuj wal tu xin, c'amxa yalbanil yayji oc a may a k'ak'al Mamin Jehová. Caw wal c'am junokxa mac chi je' lajlén ba etok, c'am junokxa dios axca ach, asannej ach Dios ach, atac'ala' chi yun jabeni. ²³A pax a conob Israel ti xin, c'am junokxa conob lajan yetok. Yujtol asannej wal jun nación bay sat tx'otx' ti', max a colcan el yul k'ab eb ajc'ul yujc'al wal yoccan a conobok. Yuj a camc'ulal yin, yetok yuj a mayk'ak'al, c'al yuj tzet yetal tol c'ayubtak max onej, max eon eltek a conob tu' bay Egipto, cax max a beson el juntzan nación c'al comon dios yulak be yuj a mimanbilal, ²⁴yujtol ach max con aoc a conobok yin tojbalk'inal, xan ach max ach occan co Diosalok.

²⁵Yuj wal tu xin, Mamin Jehová, yunokabc'al tzet yetal max al win ayin a chekbej in ti', yetokc'al yin masanil winatil. Axcaokab tu' chi yun yion ba tzet max ala'. ²⁶Yet watx' mimanbil ach yin tojbalk'inal, cax chi yalon eb anima tol ach Jehová Dios, Yajaw ach yin Masanil, ach ton co Diosal ayon israel on ti'. Ac'ala' axca tu' ok yun yocc'al winatil yin reyal a satak. ²⁷Ach Mamin Jehová, Yajaw ach yin Masanil, co Diosal ach, ach wal chak' wojtaknej elok tol ok occ'al winatil yin yajawilal. Yuj tu' xan chin tec'baj in ba in k'anon jun ti' ayach. ²⁸Ach ti' Mamin Jehová, Dios ach, a tzet chala' chic'al yunej, yelxac'al watx' tzet max ak' a ti' ak'on ayin. ²⁹Elokab yin a c'ul chak' a watx'c'ulal yin winatil yet chi tec'bajc'al ba a satak. Ach wal max alcan jun ti' Mamin Jehová, xan a yuj a watx'c'ulal, watx'c'al ok yuncan winatil yin tojbalk'inal, xi David.

Ocnakc'al cham rey David yin owal

(1 Cr 18.1-13)

8 ¹Max yak' David owal yetok eb filisteo, max yion ec' yikbej eb, axa cancan eb yul k'ab cham tu'. ²Max ay c'apax c'ay eb moabita yuj. Max cheklay ay latz'an masanil eb yuj bay sat tx'otx', axa yechen yetok jun tx'an. A jantak mac chi cancan bay yul cab tx'anil chi cami, axa mac chi cancan yul yet is yox tx'anil xin, c'am chi cami. Caytu' max yun cancan eb moabita yalan is yikbej cham rey David. Max occan eb yin tojlalal.

³Max yak' cham rey David owal yetok cham reyal Soba, a ton Hadad-ezer is c'ajol Rehob, yet lanan toj Hadad-ezer tu' yion pax ec' is makbej bay a' miman aej Éufrates. ⁴Max yitek cham rey David 1,700 eb soldado

tu' yin presoal, a ton eb ayoc yiban chej, yetok c'apax 20,000 eb toc'al chi beyi. Max c'upon c'apax tok tx'anil yakan no chej inej oc carruaje yet owal, asanxanej no' tol yowalil chi k'anlay yin 100 carruaje max can yuj.

⁵Ayman max apni oc eb sirio max tit bay Damasco colwaj yetok Hadad-ezer, palta max ayc'ay eb sirio tu' yuj cham rey David, max cam 22,000 eb yuj. ⁶Ayman max yaoc cham rey David eb soldado taynemalok is makbej eb tu', caytu' max yun cancan eb sirio yul k'ab cham, max oc eb yak'on tojlalal. Axca ton tu' max yun yak'on Jehová is colwal bay cham, tzanc'al bay max toj yak' owal max ayc'ayc'al eb yuj.

⁷Max lajwi tu' max yioncan ec' cham rey David makbal julbalej ayoc oro yin yet eb soldado Hadad-ezer, max yiontek bay Jerusalén. ⁸Caw wal miman ch'en bronce max yi' c'apax bay conob Beta c'al bay Berotai, a ton juntzan conob tu' ay yul is makbej Hadad-ezer.

⁹A pax Toi, reyal Amat xin, max yabej tol mayal lajwi masanil eb is soldado Hadad-ezer yuj cham rey David. ¹⁰Xan max chektok is c'ajol chi yik Joram bay cham rey David, yetok plata, oro, c'al bronce, yuj yak'lay cawil c'ul, c'al yuj yilay aj can yujtol max ayc'ay Hadad-ezer yuj, yujtol a Toi tu' max yak'c'al owal yetok. ¹¹A masanil juntzan ch'en max cha' bay Toi tu' max yak' cham rey David bay Jehová, yetokc'al ch'en oro c'al ch'en plata max tit bay masanil juntzanxa nacionlak max ayc'ay yuj. ¹²a ton bay Edom, bay Moab, bay eb amonita, bay eb filisteo, bay eb amalecita, c'al ch'en max ec'can yet max oc owal yetok Hadad-ezer is c'ajol Rehob, a ton reyal Soba.

¹³Caw wal miman max yun binaj cham rey David a yet max meltzotjek yin yak'on owal yin eb edomita, 18,000 eb max ayc'ay yuj bay yac'alil yet atz'am. ¹⁴Ayman max yaoc cham eb soldado taynemalok bay Edom. Masanil eb edomita max cancan eb yul k'ab cham rey David. A Jehová max colwaj yetok tzanc'al bay chi toj yin owal.

Eb is chekbej cham rey David

(2 S 20.23-26; 1 Cr 18.14-17)

¹⁵A cham rey David max yak' reyal yin tojolal c'al yin watx'il bay xol eb israel is yet conob. ¹⁶A is yajawil eb soldado, a ton cham Joab is yune' xal Sarvia. Axa Josafat, is c'ajol Ahilud, a jun ti' max yak' ajtz'ibal bay cham rey. ¹⁷Axa pax Sadoc is c'ajol Ahitob, yetok Ahimelec is c'ajol Abiatar, a juntzan eb tu' sacerdote yayji. Axa Seraías xin, max tz'ibej yabixal tzetak max yun cham rey. ¹⁸Axa pax Benaía is c'ajol Joiada, yajaw yayji yiban eb soldado chi taynen cham rey, a ton eb cereteo c'al eb peleteo, axa eb c'ajol cham rey David, sat yajaw yayji eb.

Is watx'c'ulal David yin Mefi-boset

9 ¹Max k'anlej cham rey David: ¿Ay tom wal junokxa is yinatil Saúl max can, bay chi je' in colwaji, yuj in camc'ulal yetok Jonatán? **xi.**

2Ay jun is chekbej Saúl chi yik Siba, max awtelay bay satak rey David.
A yet max apni oc xin, max k'anlen cham bay:

—¿Ach mi ti' chek Siba? ñi bay.

—Ja', ayin ton mamin rey, ñi Siba.

3Cax max k'anlen cham bay nak:

—¿Ay tom wal junokxa is yinatil Saúl ayic'ok, bay chi je' in colwaj bay yet chi wikej in trato max in watx'nej satak Jehová? ñi.

Max tak'wi Siba:

—Ay jun is c'ajol Jonatán, man watx'ok yayji yakan cabil, ñi Siba.

4—¿Baytal ay nak? ñi David.

—Ata tu' ay bay Lo-Debar bay yatut Maquir is c'ajol Amiel, ñi Siba.

5-6Max lajwi tu xin, cax max yak'on David toj tit Mefi-boset is c'ajol Jonatán, yitxiquin Saúl. A yet max jayoc bay satak rey David, max ay nojanok.

—Mefi-boset, ñi David.

—Tix in ti, mamin rey, ñi.

7Max yalon cham bay:

—C'amokabxa a bilc'ulal, caw wal tol xajan ok ach wila' yuj in camc'ulal yetok Jonatán a mam. Ok wak' masanil tx'otx' a mamicham Saúl ayach, yetok c'apaxok, ok ach lowc'al wetok, ñi.

8Max ay nojnaj Mefi-boset, max yaloni:

—Mamin rey, ¿tzet wal yuj xan chi cus a c'ul win ayin a chekbej in ti', yujtol lajanxac'al wayji axca junok no camnak tx'i'? ñi.

9Cax max awtelay Siba tu', a ton jun is chekbej Saúl yet payxa:

—Ti' wal ok wak' pax masanil tzet yetal yet a patrón c'al yuninal bay jun is yitxiquin ti'. 10Ach ti' ok ach mulnaj bay sat tx'otx' tu' yetok masanil a c'ajol c'al yetok masanil a chekbej. A masanil tzet chi aj bay sat tx'otx' cax cha wajban yul junok is c'unail, yet watx' chi oc yopiso yuj yuninal Mefi-boset ti'. Axa pax a' xin ok lowc'al wetok, ñi David bay.

Ay olajonwan c'ajol Siba tu', cax ay junc'alwan is chekbej. 11Cax max tak'wi Siba:

—A masanil tzet cha chek in watx'nej ti', ok in watx'nej, ñi.

Axa pax Mefi-boset xin, axcaxa yuninal rey David max yutcan bay yatut, a tu' chi low junjun c'u. 12Ay jun is c'ajol Mefi-boset tu' yaliñto chi yik Micaía. A masanil mac ayic' bay yatut Siba tu', is chekbej Mefi-boset yayji eb. 13Man watx'ok yayji yakan Mefi-boset tu' cabil, yuj tu' a tu' ayic' bay Jerusalén, cax axac'al tu' max low yetok David.

Yayc'aybal eb sirio c'al eb amonita

(1 Cr 19.1-19)

10 1A yet mayal ec'c'al el tiempo xin, max cam Nahas, a ton is reyal eb amonita, axa is c'ajol chi yik Hanún max occan yin reyal.

2Xan max na' cham rey David tol yowalil chi camc'ulnelay Hanún is

c'ajol Nahas yuj, axca wal max yun camc'ulnelay David yuj cham Nahas tu', xan max chektok cham rey David juntzan is chekbej bay Hanún yuj mimanc'ulnelayi yuj camichal is mam tu'. Palta a yet max apni oc eb chekbej bay is conob eb amonita, ³a eb cham yajaw conob yayji bay tu' max yal eb bay Hanún is reyal eb: ¿Tom chaoc yin a c'ul tol a juntzan winak max chektek cham rey David ti' tol chach ul yak' mimanc'ulal eb? ¿Chi mi a na' tol mimanxac'al yelapnok a mam tu' yul sat cham rey David tu', mamin rey? ¡A jun rey tu' tol max chektek juntzan winak ti' yet chi ul yil eb tzetbil yili jun co conobal ti', cax ok ul yak'on lajwok! ñi eb bay.

⁴Yuj tu xin, max chekon Hanún tu' mitx'lay eb chekbej cham rey David, max tzuklay el nanok xil ti' eb, max c'uplay el tel is pichil eb masantac'al yin chop eb, max lajwi tu' max chekon pax eb. ⁵A yet max yaben cham rey David axca tu', max cheklay toj chalay eb yujtol caw wal chi q'uixwi eb, max al-lay bay eb tol chi cancan eb bay Jericó masantac'al chi yal ch'ib xil ti' eb, catatu' chi je' meltzotjek eb.

⁶Axa eb amonita xin, max nachaj el yuj eb tol yob max can eb yul sat cham rey David, xan max tojlanej eb 20,000 soldado yet Siria bay yul yet Bet-rehob c'al yul yet Soba, bay reyal Maaca max tit mil soldado, max tit c'apax 12,000 soldado aj Is-tob. ⁷Palta max yab David jun tu', xan max chektok Joab yetokc'al eb soldado. ⁸Max eltek eb amonita, max watx'nen oc ba eb yin owal bay ti' conob eb tu', yak'ban a eb soldado yet Siria bay yul yet Soba, c'al eb max tit bay Rehob, c'al eb soldado yet Is-tob, c'al eb max tit bay Maaca, max watx'nej c'apax ay ba eb bay najat ay el ti' conob tu'. ⁹Axa yet max yilon cham Joab xin, tol lananxa jayoc jun makan eb bay is satak, c'al junxa makan bay yintak, max sic'on el cham eb soldado caw wal jalan cax max oc eb yin owal yin eb sirio. ¹⁰Axa juntzanxa eb soldado xin, max yaoc yul k'ab Abisai is yuǵtak, yet watx' a ton eb tu' chi toj yin eb amonita. ¹¹Max yalon bay eb axca ti': Tatol a eb sirio yelxac'al ok je' yuj eb wintak, ach ti' ok ach jayoc colwaj wetok. Tatol a eb amonita yelxac'al ok je' yuj entak ach ti', ayinx a ok in tok colwaj etok. ¹²Ak' ep xin, co tec'bij co ba yuj co colon co conob ayon is conob on co Diosal ti'. Yunokab Cham bay chi yochej c'ul, ñi cham Joab.

¹³Lajwi tu' max toj cham Joab yak'on owal yin eb sirio yetok is soldado, axa eb tu' max elaj eb satak cham Joab. ¹⁴A yet max yilon eb amonita tol mayal elaj eb sirio, cax max el c'apax aj eb satak Abisai, caytu' max yun yoctok eb colon ba bay yul is conobal tu'. Yuj tu' xan max bek cham Joab yak'on owal yin eb amonita, max meltzotjek bay Jerusalén.

¹⁵A yet max yilon eb sirio tol max ayc'ay eb yuj eb israel, max wajban ba eb junelxa. ¹⁶Max awtelaytek eb sirio yuj rey Hadad-ezer, a ton eb ay bay junxa k'axepaltok a' Éufrates, cax max apni oc eb bay conob Helam. A cham Sobac babel satak eb, a ton yajawil eb soldado yet rey Hadad-ezer. ¹⁷Palta max al-lay juntzan ti' bay cham rey David, xan max yun toj pax yetok eb soldado israel max k'axpoj ec'tok eb bay a' Jordán, max apni oc eb bay Helam. A bay tu' max tec'bij ba eb sirio satak cham rey David, max yak'on eb owal yin. ¹⁸Axa max yun xin, max elaj

eb satak eb israel. Max mak'on cam cham rey David 40,000 eb soldado ayoc yiban chej, c'al yetok 700 eb ayoc yul carruaje, cax max cam c'apax Sobac yajawil eb soldado sirio yuj bay tu'. ¹⁹A yet max yilon masanil eb rey ayoc yetok rey Hadad-ezer tol mayal ayc'ay eb yuj eb israel, max yaoc ba eb yin junc'ulalil yetok eb israel, xan max canxac'al can eb yalan yikbej rey David. Ataxc'al yet tu' max xiwxac'al aj eb sirio tu', c'amxa chi yaoc ba eb colwaj yetok eb amonita junelxa.

Rey David yetok xal Betsabé

11 ¹A yet junxa abil yet is tiempoal toj eb rey yin owal, max yatok cham rey David Joab yetok masanil eb yajawil eb soldado, yetokc'al masanil eb soldado israel yin owal, cax max c'ayon el eb eb amonita, c'al yoyon ba eb yin conob Rabá. Maj tok cham rey yetok eb, palta max can bay Jerusalén.

²A yet jun k'ekbintakil xin, max aj wan cham rey David bay sat is tx'at, cax max eltok ec'jab bay pananil yiban is yatut. A yet lanan yec'jab tu' max yilontok jun ix ix lanan yachinwi, caw wal watx'xac'al yili ix max yiltok. ³Ayman max chek toj k'anlej mactxel jun ix ix tu', cax max al-layi tol a ix Betsabé is cutz'in Eliam, is yistzil Urías heteo ix. ⁴Ayman max bet yak' tit ix yuj is chekbej, cax max way yetok ix. Max lajwi tu' max sakbanen ba ix, max meltzoy bay yatut.

⁵Axa max yunej max occan ix yobixal, xan ayman max yatok ix k'anlej bay cham rey David. ⁶A yet max yaben cham axca tu', max yaontok k'anlej bay Joab tol chi meltzoytek Urías heteo. Cax max yiken Joab jun k'anlej tu'. ⁷Axa yet max tx'oxon ba Urías bay satak cham rey, max k'anlen cham ta watx' c'ul Joab yetok eb soldado, c'al tzetbil yayji owal. ⁸Max lajwi tu' cax max chekontok cham tu' bay yatut xewok.

Maxc'al wal eltok Urías bay yul yatut cham rey, cax max chekon cham tu' yilaytok loj caw wal watx' bay. ⁹Palta maj tok Urías tu' bay yatut. A tu' max cancan way yetok eb soldado chi taynen despacho tu'. ¹⁰Axa yet junxa c'ual max al-lay bay cham rey David tol a Urías maj apnok way bay yatut yet jun ak'bal tu', xan max k'anlej cham bay:

—¿Tzet yuj xan maj ach tok way bay atut, ilab tol ayxatax max ach tojcanok? Xi cham rey tu' bay.

¹¹Max tak'wi Urías bay:

—¿Tom ok je' in c'ul ok in apnok bay watut ok in lowok c'al in way yetok wistzil xin? Ilab te cañail trato yet Jehová, eb wet soldadoal aj israel, c'al eb aj Judá, xaklak te' ch'an ay aj yiban eb nak, ac'ala' in yajawil Joab c'al eb yet yajawilal, sat ac'al chi way eb. C'amc'al chi jal jun tu' mamin rey, c'amc'al chi je' in c'ul tol watx'xac'al bay ok in wayok, xi Urías.

¹²Max yalon cham rey David tu' bay:

—Canan yet junxa ak'bal ti', yet yecal cax chach toji, xi bay.

Axca tu' max cancan Urías junxa ak'bal tu' bay Jerusalén. ¹³Max yawtey rey David tu' low yetok, cax max uc'wi an yuj. Max c'ay c'ul Urías tu' yuj an, palta man yujok tu' max toj way bay yatut, axac'al tu' max can way yetok eb soldado junelxa.

¹⁴Axa yet max k'linibi aj yet junxa c'ual max tz'ibentok rey David jun carta bay Joab, max chekon yitok Urías tu' tx'an. ¹⁵Max yalontok yul tx'an: Aek oc Urías satak bay caw wal ow yak'on owal cax chex el c'atan yet watx' chi cami, ñitok cham rey David.

¹⁶Yuj tu xin, a yet max yoyon ba Joab yetok is soldado yin jun conob tu' yin owal, a bay ayic' eb ajc'ul tol caw wal jelan, a tu' max yaoc Joab tu' Urías. ¹⁷Axa max eltek eb ajc'ul tu' bay yul is conob yin eb yet Joab, ay eb soldado max cami, cax max cam Urías xol eb nak tu'.

¹⁸Ayman max yatok Joab is chekbej bay rey David yuj yalon tzetbil max yun yeloc owal. ¹⁹Max yalon bay: A yet ok lajwok alon bay cham rey yuj tzet max yun yoc owal tu', ²⁰talaj chi tit yowal cax chi yaloni: ¿Tzet wal yuj xan max e jitxzac'al oc e ba c'atan eb ajc'ul tu'? ¿Tom man e yojtakok xin tol suboj bekon aytok eb junok tzet yetal e yiban bay yiban muralla? ²¹¿Tom man e yojtakok yabixal tzet max yun jun ix ix bay Tebes, max bekaytek ix jun ch'en ch'en yet molino yiban jolom Abimelec is c'ajol Jerobaal? Xan mata maj e jitxzac'al oc e ba, ta ñi, cax chaloni tol max cam c'apax Urías hitita, ñi Joab.

²²Cax max toj jun chekbej tu xin, max yalon bay cham rey David axca max yun yalon Joab.

²³Max yalon jun chekbej tu' bay cham rey David:

—Caw wal ow max yun yelol eb ajc'ul tu' jin, ijan wal max on ayc'ay yuj eb, palta xin max uj meltzok eb yintak juj on, masantac'al max on apni yintak eb bay puertail is conob eb tu'. ²⁴A yiban muralla max julwajtek eb nak ajc'ul tu' yin eb a chekbej, yuj tu' max cam jaywan eb nak soldado, cax max cam c'apax Urías heteo, ñi jun chekbej tu'.

²⁵Max yalon cham rey David bay jun chekbej tu':

—Al bay Joab tol c'amokab chi oc yin bilc'ulal yuj jun tu'. Cac'alta' tu' yin owal ti', ayc'alta' mac chi cami. C'amokab chi pax wanajok, tol yelc'ulal che yi e yip, masantac'al chi yal yayc'ay eb e yuj, cachi, caytu' chi yun eptzen Joab tu', ñi rey David bay jun chekbej tu'.

²⁶A yet max yaben aj ix yistzil Urías tol mayal cam yichamil, max oc ix yin cusc'ulal yuj. ²⁷A yet max lajwi yec'tok c'ual is cusc'ulal ix xin, axca ta is beybal eb, cax max yak'on rey David toj tit ix bay is yatut, max yaon oc yistzilok, cax max alji yune' ix. Palta xin, maj cha c'ul Jehová tzet max yun cham rey David tu'.

Tzubanil cham rey David yuj Natán

12 ¹Max cheklaytok Natán yuj Jehová bay cham rey David; a yet max apni oc bay satak max yaloni:

—A bay yul jun conob ay cawan winak: jun nak caw wal beyom, axa junxa caw wal meba'. ²Xiwil is calnel c'al is wacax jun beyom tu'. ³Axa pax jun meba' xin, jun wal ch'an c'otan is calnel, tol manbil yuj, cax a' max ilon ch'ibok. A tu' max ch'ib no' bay yul is yatut yetok eb unin. A tzet chi lo' yul

yatut, a' chi lo no'; a yul is vaso bay chi yuc'a', a tu' chi yuc' no' ya'. A bay txam is c'ul, a tu' chi way no', caw wal ochebil no' yune' calnel tu' yuj; axca wal is cutz'in yayji oc no'. ⁴A yet jun c'ual xin, max apni oc jun ec'jabwom yulanan jun beyom tu'. A jun beyom tu' maj wal mitx' junok no' is calnel tu', caw wal tol ya' yel yuj, palta a no' jun ch'an c'otan yet jun meba', a' max bet yak' titok. A' max yak' chi' is yula' tu', xi Natán bay.

⁵Max tit numnaj max yil David, max yalon bay Natán:

—Satak wal Jehová Dios chi wala', a jun mac chi uten axca tu', moj wal chi cami. ⁶Cax yowalil chi yak' canc'onok is q'uexel no yune' calnel tu', yujtol a jun winak tu' c'am wal jabok yabenc'ulal yin yet animail, xi.

⁷Max yalon cham Natán:

—A jun tu', ach toni. Axca ti' yalon Jehová co Diosal ayon israel on ti' ayach: Ayin max ach in siq'uil reyalok israel, max ach in colon el bay yul is k'ab Saúl. ⁸Max wak' yatut c'al yistzil a yajawil tu' ayach, cax max ach waon oc reyalok conob Israel c'al Judá. Ta txennej juntzan tu' chabej, maxto je' wak'on tz'akil ayach. ⁹¿Tzet yuj xan max entaknej el in chekbanil, max on tzet yetal tol c'am chi cha' in c'ul? Max a mak' cam nak Urías heteo, yuj is yespada eb amonita, cax max aon oc yistzil nak tu' estzilok. ¹⁰Yuj tu' xan ayc'al mac ok mak'lay cam xol enatil, yujtol max in entaknej elok, max aon oc yistzil Urías heteo estzilok. ¹¹Ayin Jehová in chi wala': Ayin ok waoc yatakilal eban. A yatakilal tu' ok eltek xol eb a c'ajol, a satak wali ok wion eltek eb ix estzil cax ok wak'on bay junok a c'ajol, cax a' ok way yetok eb ix yet c'ualil. ¹²Ach ti' ewantak max otej, axa ayin ti' yet wal sakk'inal yet c'ualil ok in tx'oxon el bay satak conob Israel, xi Jehová, xi cham Natán.

¹³Max tak'wen oc cham rey David mulok bay satak cham Natán, max yaloni:

—Yel wali, max oc in mul bay Jehová, xi.

Max yalon pax cham:

—Manak tu' yel toni, palta ok ak'lay tan a mul yuj Jehová, xan c'am chach camxac'al. ¹⁴Palta oj wali xan chi al-lay yobal k'anej yin Jehová yuj eb yajc'ul yuj tzet max on tu', xan ok cam jun a c'ajol tolto max alji tu', xi cham Natán.

¹⁵Max lajwi tu' cax max meltzojtok cham Natán bay yatut.

Axa max yun xin, max yabi ay jun is c'ajol cham David tu' yuj Jehová, a ton jun is c'ajol yetok ix yistzil camom Urías tu'. ¹⁶Max lajwi tu', cax max oc ijan rey David k'anon bay Jehová tol chi jay c'ul nak. Max oc yin c'ajbanc'ulal cax tx'okxa max way sat tx'otx'. ¹⁷A jantak eb yicham winakil conob chi mulnaj yetok, chi oc tean eb yin tol chi aj wanok, palta c'amxa chi yal c'ul, tamwal maxto toj low yetok eb.

¹⁸Axa yet suk c'ual michchaj nak unin tu', cax max cami. Caw wal max xiw eb mulnajwom tu' yalon bay, yujtol chi na eb: Toltax c'am chi yab tzet chi jal yet iquisto nak unin ti', akxam wal ta chi jal bay tol mayal cam nak unin ti', tx'okxam chi yut ba, xi eb.

¹⁹Max yaben cham rey David yet chi sajlabi eb k'anjabi, max nachaj el yuj tol mayal cam nak unin tu', xan max k'anlej:

—¿Tom mayal cam nak unin tu'? xi.

—Mayal cam nak, mamin, xi eb.

²⁰A yet max yaben axca tu', max aj wan bay sat tx'otx' tu', max achinwi, cax max yaon ajtok yanil xil is jolom, max q'uexon el is pichil, axa yoc yin ayilal bay yul templo Jehová. Max lajwi tu' cax max toj k'anon low ba bay yul yatut. ²¹Max k'anlen eb is mulnajwom tu' bay:

—¿Tzet wal yelapnok jun chon ti', mamin rey? A yet iquisto jun a c'ajol tu' caw wal c'am chi je' a c'ul chach lowi, cax chach ok' oc yin. Axa pax tinani' mayal cam nak, cax chach aj wan a lowi, xi eb bay.

²²Max tak'wi cham:

—A yet iquisto nak unin tu' chin oc yin c'ajbanc'ulal cax chin ok' yin nak, a in naoni talaj maxto el yin c'ul Jehová colchajcan nak. ²³Axa pax tinani' ta mayal cam nak, tzetto wal chi oc tol chin oc yin c'ajbanc'ulal ta majxa ta jay c'ul nak, ayinx a ok in tok bay ayic' nak tu', manxanak nak ok tit ayin ti', xi cham.

Yaljubal Salomón

²⁴Max lajwi tu' max betic' cham yilon ix Betsabé yet chi mimanc'ulneni, cax max way yetok, axca tu' max jay junxa is yune', max yak'on eb yik Salomón. Axa Jehová max camc'ulnen jun unin tu', ²⁵cax max chekontok Jehová cham Natán yalon bay cham rey David tol camc'ulnebil jun unin tu' yuj. Yuj tu' xan Jedidías max yak' yik nak yaliñ unin tu'.

Yayc'aybal conob Rabá yuj cham rey David

(1 Cr 20.1-3)

²⁶Yak'ban tu' max oc cham Joab yak'on owal yin eb amonita bay Rabá. A yet toxa wal chi ayc'ay jun conob tu' yuj, ²⁷max yaontek jun k'anej ti' bay cham rey David axca ti': Mayal quin oc yin wak'on owal yin Rabá, mayal oc a' aej chi oc xol conob yul in k'ab. ²⁸Yuj wal tu' xin, mamin rey, wajbaj oc juntzanxa eb soldado, yet watx' ach wal caw ok ach oc ak'on owal yin jun conob ti' cax ok ayc'ay oj, c'am chi wochej tol ayin ti' chin oc yin cax ayinxac'al ok in binajcan yin, xitok cham Joab.

²⁹Cax max wajon oc cham rey David masanil eb is soldado, max toj yak'on owal yin conob Rabá. Max ayc'ay yuj, cax max yion canok. ³⁰Lajwi tu' max yion el is corona jun rey tu' yin is jolom. Ay juntzan ch'en ch'en caw wal watx' yili ayoc yin. A jun corona tu' caw wal al, axca mi oxebok arroba yalil. Max yaon aj eb ch'en corona tu' yin jolom cham rey David. Ay c'apax xiwilxa tzet yetal tol caw ay is tojol bay jun conob tu' tol max yion eltek cham rey David tu'. ³¹Axa eb anima maxto cancan bay jun conob tu', max ilay eltek eb yuj, max alay oc eb yin mulnajil, axca yin sierra, yetok ch'en pico, c'al yetok ch'en echej. Max alay c'apax oc eb yin ak'oj tz'a ladrillo bay horno. Ca c'apax tu' max yun yetok masanil eb aj conoblak Amón. Lajwi tu' xin, max meltzotjek yetok masanil eb is soldado bay Jerusalén.

Yabixal Amnón yetok ix Tamar

13 ¹A Absalón is c'ajol cham rey David ay jun is yanab caw wal watx' yili, a ton ix chi yik Tamar. Axa max yun xin, tol a Amnón is c'ajol c'apax cham rey David max oc is nabal yin ix. ²Max yabaxac'al ay Amnón yuj is nabal ayoc yin ix Tamar is cab yanab. Yujtol caw wal taynebil ix yujtol k'opojto ix, xan max na' Amnón tol c'am tzet watx' chi yun yayc'ay ix yuj. ³Palta a Amnón tu' ay jun yamigo caw wal aj nabal yin yobtakil, a ton jun chi yik Jonadab. A jun tu' is c'ajol Simea, is yuxtak cham rey David. ⁴Ay jun c'ual max k'anlej Jonadab tu' bay: ¿Tzet chach on ach c'ajol rey? ¿Tzet yuj xan junjunc'al c'u caw wal cusiltak a c'ul? ¿Tom c'am chal ayin tzet chach oni? Xi nak.

Catatu' max tak'wi Amnón bay axca ti':

—Caw wal chi wochej oc ix Tamar in cab anab, yanab in cab uxtak Absalón, xi Amnón.

⁵Axa yalon Jonadab tu' bay axca ti':

—A tinani' ocantok telan bay a tx'at, cax cha tz'akon yaban a ba. A yet ok apnok oc a mam cach yiloni, cax chalon bay ta chi el yin c'ul tol chi cheklaytok ix Tamar yuj, yet chi toj yak'on ix jabok a lobej, a wal caw ix chi watx'nen junok a lobej tu', yet watx' ok ela', ok a loon jun loj ok watx'nej ix tu', xi nak.

⁶Caytu' max yun yoctok telan Amnón tu' bay is tx'at, max tz'akon yaban ba. A yet max betic' cham rey tu' yiloni, max yalon Amnón tu':

—Matawal chi el yin a c'ul tol chi tit ix wanab Tamar cayti', cax chi watx'nen ix cabok jenan in pan, a wal caw ix chin ak'on lowok, xi bay cham rey.

⁷Yuj tu' max cheklaytok ix Tamar yuj cham rey David, max yalon bay:

—Asi', bay nak a nuej Amnón, bay yatut nak tu' chi toj a watx'nej janic'ok tzet chi lo nak, xi cham.

⁸Xan max toj ix Tamar bay yatut is nuej, telan ajok max apni oc ix satak wali. Max somon aj ix ixim harina, a bay tu' max watx'nej ix pan.

⁹Ayman max yitek ix ch'en xaltin, max watx'nen ix loj tu', max secon eltek yul xaltin tu', palta a Amnón maj yal c'ul max lowi, max yaloni tol chi eltok masanil anima ayic' yetok bay yul na. ¹⁰A yet mayal eltok eb tu' masanil bay yina, max yalon Amnón tu' bay ix Tamar:

—Ach wal caw chetek in lobej tu' bay ayin ec' ti', xi bay ix.

Caytu' max yun yiontok ix Tamar ixim loj bay Amnón is nuej tu' bay is tx'at. ¹¹A yet max apni oc bay is c'atan yet chi low tu' yaloni, max oc lacan yin ix, max yaloni: Sebach ach wanab, tol ok ach way wetok, xi bay ix.

¹²Max tak'wi ix bay:

—C'amak ach in nuej, manchak in ak' plural, yujtol a jun ti' c'am bay chi uj bay co xol ayon israel on ti', yujtol yelxac'al yob jun nabalej tu'.

¹³¿Baytal ok ca in toj yetok jun q'uixwilal tu'? Axa ach ti' axcaxac'al junok suc'al anima ok oncan bay xol co conobal ti'. A tinani' chin tewi ayach tol chal bay cham rey, a cham ok in ak'on ayach etbiok, xi ix.

¹⁴Palta a Amnón xin, majxac'al cha yab tzet max yal ix tu'. Tutun tol xiwil yip yintak ix xin, xan max ak'layxac'al pural ix yuj, yin yetneni. ¹⁵A yet mayal etnelay ix tu', max oc jun miman yobc'ulalil yin Amnón tu' yin ix, yelxac'al max jajlay ix yuj, yintak axca max yun yoc is came'ulalil yin ix yet babelal, xan max yal bay ix axca ti': Ajan wanok cax chach toji, xi bay ix.

¹⁶Palta max tak'wi ix Tamar, max yalon ix bay:

—C'amak ach in nuej, tatol chin oktej pax eltok cayti' tinani', a jun tu' yelxac'al yob yintak tzet yetal mayal on win ti', xi ix.

Palta Amnón majxa cha yabej. ¹⁷Axa max yutej tol max yawtej is chekbej, max yalon bay tol chi uktelay eltok ix yina yuj, cax chi makay puerta yin aymanil.

¹⁸Xan max uktelay eltok ix yuj jun chekbej tu' bay yina, lajwi tu' watx' max yun makchencan puertail te na tu'. Axa ix Tamar xin, tutun ayoc jun pichilej yelxac'al watx' yuj, axcac'alta' yet eb ix k'opoj cutz'in rey chi yaocok. ¹⁹Max yaajtok ix tik'ak'il tan yiban is jolom, max tzilontok ix an pichilej ayoc yuj tu', max yaon oc is k'ab yin sat, max ok'i max toj yulak be. ²⁰Catatu' max k'anlen is nuej chi yik Absalón bay:

—¿A ton mi jun ti' max ach yut jun a nuej Amnón tu'? Tatol axca tu' ach wanab, tz'in cachi. C'amokab chach oc yin bilc'ulal yuj jun tu' yujtol a nuej nak tu'.

Xan max cancan ix Tamar tu' yin cusc'ulal bay yatut Absalón is nuej tu'.

²¹A yet max yaben cham rey David masanil tzet max uj tu', max tit wal yowal cham. ²²A pax Absalón xin, c'am c'apax tzet max yal bay Amnón, caxc'al caw wal ay is chichonc'ulal yin, yujtol mayal etnelay ix Tamar is yanab yuj.

Paktzebal Absalón bay Amnón

²³Cabxa abil tu', a yet junel lanan tzukwi calnel eb nak is chekbej Absalón bay Baal-hazor, bay cawilal conob Efraín. A yet tu' max awtelay masanil eb c'ajol cham rey yin jun miman loj yuj Absalón. ²⁴Max bet ilay c'apax cham rey yuj, max yalon bay:

—A tinani', lanan tzuklay in calnel yuj eb in chekbej. Chi wochej mamin rey, tol chach toj wetok yetok masanil eb a chekbej.

²⁵Palta max tak'wi cham rey bay, max yaloni:

—C'amak ach in c'ajol, c'am chi je' co toj co masanil ayach tu'. C'am chi wochej tol mimanxac'al chi yun a gasto wuj, xi cham.

Caxc'al max occ'al tean Absalón tu' yin cham rey, palta majc'alta' yal c'ul cham max toji, asan xin, max yal cham watx' k'anej yin.

²⁶Palta a Absalón xin, maxtoc'al yala':

—Ta wal yel c'am chi je' a toj xin, elok yin a c'ul a chaontok wux'tak Amnón wetok, xi nak.

—¿Tzet yuj xan chi yochej a c'ul chi toj nak oxtak Amnón tu' etok? xi cham rey tu' bay Absalón.

²⁷Palta max occ'al tean Absalón tu' yin cham rey, xan max chatok Amnón tu' yetokc'al juntzanxa eb yuxtak.

²⁸Yet c'amto chi oc loj max yalon bay eb is chekbej: Chi cam e yiloni a yet mayal aj an jolom Amnón, ok walon ayex tol che mak' camok, cax che mak'on cam xin. C'amc'al chex xiwi, yujtol ayin chi wala', xan yelc'ulal ok e tec'baj e ba e yuneni, xi Absalón.

²⁹Yuj tu' xan max yikey eb tzet max yal Absalón, max mak'lay cam Amnón. Lajwi tu' max aj wan masanil eb is c'ajol cham rey, max oc eb yiban is mula junjun, max toj eb elajok.

³⁰A yet ayto oc eb yulak be, max apni oc k'umal bay cham rey David tol mayal cam masanil eb is c'ajol yuj Absalón, c'amxa junok eb tu' maxto can yin yiquisal. ³¹Xan max aj lemnaj cham rey, max tzilontok is pichil, max bekon ay telan ba sat tx'otx', yuj tx'oxon elok tol ay is cusc'ulal. Axa masanil eb is chekbej ayic' bay tu' max tzil c'apaxtok eb is pichil. ³²Palta a Jonadab is c'ajol Simea, yuxtak cham rey David, a' max alon bay axca ti':

—Manchak a na' axca tu' mamin rey. C'am eb nak a c'ajol tu' max cam masanil, palta asan nak Amnón max cami, yujtol axca tu' max yun naon Absalón yin, yettaxc'al max etnelay ix Tamar yuj. ³³Yuj tu' xan c'am cha na' mamin rey, tol masanil eb nak a c'ajol max cami, palta asan Amnón max cami, xi nak.

³⁴Yak'ban tu' max toj Absalón elajok. Axa jun nak ach'ej aycan oc yin makwal, max aj t'ananok, max yiloni tol ay jun bulan anima chi aytek yin c'ul witz bay beal Horonaim, xan max toj yal bay cham rey.

³⁵Max yalon Jonadab bay cham rey:

—Lanan jayoc eb nak a c'ajol mamin rey, axca max wal ayin a chekbej in ti', xi.

³⁶Ato wal lajwi k'anjab Jonadab tu' max apni oc eb nak c'ajol cham rey tu'. A yet max apni oc eb max aj yaw eb yok'i, max ok' c'apax cham rey yetok eb, c'al yetok masanil is chekbej cham, puch miman max yun yok' eb. ³⁷⁻³⁸Axa Absalón xin, max toj elajok. A tu' max tojcan bay Talmai, is c'ajol Amiud, a ton reyal Gesur. A bay tu' max can yin oxeb abil. Axa pax cham rey David xin, max ok'c'al junjun c'u yuj is c'ajol. ³⁹Axa yet mayal ec'tok is cusc'ulal xin, yochejxac'al c'ul chi yil yin Absalón.

Max meltzoy Absalón yuj Joab

14 ¹Yojtak cham Joab yune' xal Sarvia, tol a cham rey caw wal chi cus c'ul yuj Absalón. ²Yuj tu' xan max chek toj tit jun ix caw wal aj nabal cajan bay Tecoa. Max yalon bay axca ti': Ut a ba tol ayach oc yin cusc'ulal, cha pichon a ba yetok pichilej yet cusc'ulal. C'am chaoc perfume en. Axa wal junok ix tol payxac'al c'oli yoc yin cusc'ulal yuj junok camnak, caytu' chot a ba. ³Lajwi tu' cax ok ach oc satak cham rey, ok alon axca tzet chi wal ayach ti', xi cham.

Lajwi tu' max yalon cham Joab bay tzet yetal tol ok yalubtanej tu'.

⁴Max toj jun ix aj Tecoa tu' satak cham rey, max ay nojan sat tx'otx' yuj tx'oxon el is yaynakilal bay cham, max yaloni:

—Colwajan wetok mamin rey, *xi ix*.

⁵—¿Tzet chach oni? *xi cham*.

Max tak'wi ix ix tu' bay:

—Mamin rey, ayin ti' camnakxa wichamil. ⁶Asan cawan wune'. Ay junel max yak'lej eb owal bay xolak te'. Tutun caw wal c'am mac max pojón nan eb, xan a jun nak max mak'xac'al cam yuxtak tu'. ⁷Axa tinani' masanil eb wican chi meltzoj oc ajc'ulal win, chi yochej eb chi waoc nak max mak' cam yuxtak tu' yul k'ab eb yuj yak'on cam eb yuj is camichal nak max cam tu'. Ta axca tu' chi yunej chi elxac'al can junxa nak tu' yin satakej, cax c'amxa mac ok waoc yipok in c'ul, cax mi chi lajwi masanil yinatil wichamil, c'amxa bay ok binajtek, *xi xal ix tu'*.

⁸Max tak'wi cham rey bay xal ix tu':

—Asi' bay atut, ayin ok wila' yuj a watx'ilok, *xi*.

⁹Max tak'wi xal ix tu' bay axca ti':

—Ach mamin rey, a is mul nak wune' ti' ayokab c'ay wiban c'al yiban masanil eb wican, palta manokabnak eban, c'al yetok yiban a makbej chi ayc'ayi, *xi xal ix tu'*.

¹⁰Max tak'wi pax cham rey tu' bay xal:

—A mactxel chi yochej chach etnen tu', itek ayin cayti' yet watx' manxa ok ach yetnejc'al eb, *xi*.

¹¹Palta max occ'al tean yin cham rey:

—Chin tewi ayach mamin rey, tol cha k'an bay Jehová co Diosal, tol a jun icanejal t'inan chi paktzej is camichal nak wune' tu', c'amokab chi ajc'al can yak'wi cam anima yin mak'on cam junxa wune' ti', *xi xal*.

Palta max yal cham rey:

—Chi wak' in ti' bay Jehová tol c'am jabok tzet ok on nak one' tu', *xi cham*.

¹²Palta max occ'al ijan xal ix tu' yalon axca ti':

—Elok yin a c'ul mamin rey, tol cha cha ab junxa belan k'anej ok wal ayach, *xi xal*.

—Al xin, *xi cham rey*.

¹³Catatu' max k'anlen xal ix tu' axca ti':

—¿Tzet yuj xan axca tu' chon yin is conob Dios, mamin rey? Atac'ala' max ot alon ach ti', axa eban ok lowcanok, yuj c'am cha cha' meltzoj nak a c'ajol aycantok elaj bay najat. ¹⁴Yujtol co masanil ok on camc'alta'a. Lajan onc'al axca a' aej chi pul sat tx'otx', tamwal tol chito je' co wajban ajok, palta a Dios c'am chi yiel k'in al eb anima. A ti' yet, chi yochej chi saylay tzet chi yun meltzojtek mac najat aycantok. ¹⁵A tinani' mamin rey, max in jay ul wal juntzan ti' ayach, yujtol a eb anima chin xibten ajok. Yuj tu' xan max in na' tol chin k'anjab a satak, xan talaj c'uxan cha cha ab tzet chin k'an ti' mamin rey. ¹⁶Yuj tu' tatol cha cha ab mamin rey, chi je' ton quin a colon el bay mactxel chi yochej chin c'ayon el yetok wune', bay sat tx'otx' tx'otx' max yak' Dios co sataknej ti'. ¹⁷A ayin tol a chekbej wayji oc ti', ti' ok wechbanej tzet ok yun a paktzen ayin yet watx' c'amxa tzet ok in na', yujtol ach ti' mamin rey, ojtak wal a beyc'ulnen

el tzet yetal watx', c'al tzet yetal yob, lajan ach wal axca junok ángel yet Dios. Aokab Jehová co Diosal ayoc etok, mamin rey, xi xal ix tu'.

¹⁸Max tak'wi pax cham rey tu' bay xal:

—A tinani' chin tewi ayach tol man ok a c'ubaj el ayin tzet yetal ok in k'anlej el ayach, xi cham.

—K'anjaban mamin rey, xi xal ix tu'.

¹⁹—Xan max k'anlej cham rey tu' bay xal axca ti':

—¿Man mi nak Joab max ak'on al jun ti'? xi cham.

Max yalon xal ix tu' bay cham rey:

—Tutun wal yel chal mamin rey, a ton wal Joab, cham a chekbej yayji ocok, a' max in chekontek ayach, a' max alon c'apax ayin tzet yetal chi ul wal ayach ti'. ²⁰Max yun juntzan ti' yet chi q'uexchaj a nabal yin a c'ajol Absalón. Palta ach ti' mamin rey, caw wal aj nabal ach, lajan ach wal axca junok yángel Dios, ojtak masanil tzet yetal chi uj bay yul a makbej ti', xi xal.

²¹Catatu' max awtelay Joab yuj cham rey:

—Mayal in na', yunokab axca chi yochej a c'ul. Asi', chi toj eon meltzotek nak ach'ej Absalón, xi cham rey bay Joab.

²²Yuj tu' max ay nojan cham Joab satak cham rey sat tx'otx' yuj tx'oxon elok tol miman yelapnok yul sat, max yalon watx' k'anej yin cham rey axca ti':

—A wal tinani' mamin rey, mayal nachaj el wuj tol ay welapnok yul a sat, yujtol max a cha ab tzet max yochej in c'ul max wal ayach, xi Joab.

²³Max lajwi tu xin, max toj cham Joab bay conob Gesur yuj toj yilaytek Absalón yuj, cax chi jayoc bay Jerusalén. ²⁴Palta max yal cham rey tol t'inanc'al tojcan Absalón tu' bay yatut, c'am chi tx'ox ba satak cham. Caytu' max yun tojcan nak bay yatut, majc'al il-lay oc yin cham rey tu' yuj.

²⁵A xol masanil eb israel c'am junokxa winak watx' yili axca yili Absalón, caw wal binajbil yuj watx'il yili, masanil is mimanil c'am jabok is tacnakil. ²⁶Junel chi tzuklay el xil is jolom yin junjun abil, yujtol alxa chi yabej, yujtol a is xil tu' ec'ban canebook libra yalil, atac'ala' yechbal eb rey chi k'anbalnej. ²⁷A Absalón tu' ayxa oxwan is c'ajol, jun is cutz'in. A jun is cutz'in tu' chi yik Tamar, caw wal watx' yili ix.

²⁸Cabxa abil yapni Absalón bay Jerusalén, palta c'amc'al chi je' toj tx'oxon ba satak cham rey. ²⁹Yuj tu xin, max awtelay cham Joab yuj Absalón yet chi ilaytok bay satak cham rey yuj, palta maj tit cham Joab. Max yawten pax yet is cayelal, palta majc'al yal c'ul max tita. ³⁰Axa max yun xin, max chekon Absalón eb is chekbej, max yaloni:

—Asek bay is yawoj Joab ay bay cawilal ti' wet, bay awbil ixim cebada yuj, aek oc k'ak'al is yawoj tu', xi.

Max toj eb is chekbej Absalón, max bet yaon oc eb k'ak'al yawoj cham Joab. ³¹Axa toj cham Joab bay yatut Absalón tu', max yaloni:

—¿Tzet yuj xan max yaoc eb a chekbej k'ak'al wawoj bay in mulnajil?
xi.

³²Max tak'wi Absalón bay:

—Max in chek bet al-lay ayach tol chach tit ayin ti', yet chi toj a k'anej bay cham rey tzet yuj xan max in bet tit bay conob Gesur. Yelxac'al mi watx' tatol max in canc'al can bay tu'. Ayin ti' chi wochej chi wil yin cham rey. Ta ay in mul, chi je' chin mak'lay camok, xi Absalón.

³³Yuj tu' max toj Joab yilon cham rey, yet chi yal tzet yetal max yal Absalón. Lajwi tu xin, max awtelay Absalón yuj cham rey. A yet max apni, max ay nojan satak sat tx'otx', max chalay yuj cham, max tz'ubon el cham is ti'.

Meltzojnak oc Absalón ajc'ulal yin is mam

15 ¹A yet max lajwi yec'tok jun tiempoal, max watx'nej Absalón jun carruaje chi tok'lay yuj chej cax max sayon 50 eb winak max oc yetok. ²Junjunc'al c'u chi pet aj wan, chi bet oc lecan bay puertail conob. Junjunc'al mactxel chi octek yuj ul watx'nen is k'anej bay cham rey, chi mitx'lay oc waan eb yuj, cax chi k'anlen bay eb tzet conobal eb. A yet chi yalon eb bay tzet conobal c'al tzet tribual, ³ayman chi yal Absalón tu' bay eb: Yel toni, watx' tzet chi toj a watx'nej tu', palta c'am mactxel ayoc watx'nen el yuj cham rey, xi. ⁴Cax chi yalon c'apaxok: Tolok wal ayin chin oc reyal bay jun conob ti', cax chex jay ayin ul e k'anon watx'jok el e k'anej, wal yel ayman chin watx'nej el ayex, xi bay eb. ⁵Ay wal junxa chi yut c'apax ba Absalón tu'. A yet chi apni oc eb anima bay, a yet c'amto chi ay nojan eb satak, ayman chi mitx'lay k'ab eb yuj, chi oc lak'an yin eb cax chi tz'ubon el ti' eb. ⁶Axcac'al tu' chi utlay eb israel yuj, eb chi apni oc bay cham rey watx'nen is k'anej. Axca tu' max yun monchaj eb anima tu' yuj.

⁷A yet max lajwi caneb abil yunenc'al axca tu', max yalon Absalón bay cham rey David, is mam:

—Chin k'an ayach mamin rey, tol chin a chatok bay Hebrón, yet watx' chi wun bay max wak' in ti' bay Jehová. ⁸A yet ay into ec' bay Gesur yul yet Siria, max walon bay Jehová tatol chinto meltzoj bay Jerusalén, yowalil ok wak' junok in xajanbal bay Cham, xi Absalón.

⁹—Asi' yin masanc'ulal, xi cham rey David.

Yuj tu' xan max toj Absalón bay Hebrón. ¹⁰A wal yet tu' max yaontok is chekbej yin ewantakil bay masanil is tribual israel yet chi al-lay bay eb tol a yet ok yaben eb yok' no cacho, cax yalokab eb tol mayal oc Absalón yin reyal bay Hebrón. ¹¹200 eb winak aj Jerusalén max yawtej yetok. A eb tu' c'am jabok tzet yojtak eb tzet is nabal Absalón. ¹²A yet ayoc Absalón yak'on xajanbal, max yak'on toj tit Ahitofel aj conob Gilo bay is conob tu'. A jun tu' is yaomal oc nabal cham rey David. Axca tu' max yun yajc'al can is bisil eb anima max oc yetok Absalón.

Elnak aj rey David bay Absalón

¹³Ay jun chekbej max bet alon bay cham rey David tol ay eb israel ayxa oc yetok Absalón. ¹⁴Yuj tu' xan, max yal cham bay masanil eb ayoc yin opiso yetok bay Jerusalén:

—Tonek, elokonek bay Absalón tu'. Ta c'amak, majxa je' co colon co ba bay. C'olek e yip axc'a yuj ok jayocok cax ok on is mak'on camok, ok yak'on c'ayil masanil anima bay yul conob ti', xi cham rey David.

¹⁵Max tak'wi eb bay:

—Bekan co c'ul jiken bay tzet chal tu' mamin rey, xi eb.

¹⁶Axca tu' max yun yelaj cham rey David yetok eb xal yetbi c'al yuninal c'al yetok eb ayoc yin opiso yetok. Asanxanej lajonwan eb xal cab yistzil max cancan taynen yatut. ¹⁷A yet mayal elaj cham yetok masanil eb max toj yintak, max oc lecan eb bay tilak el conob. ¹⁸Axac'al is c'atan, lecan oc masanil eb ayoc yin opiso tu' yetok. Axa pax eb soldado chi taynen eb xin, eb cereteo, c'al eb peleteo, max txoloc ba eb is satak, c'al eb 600 soldado aj Gat max tzakloj yintak eb. ¹⁹A yet jun bek tu' max yalon cham rey David bay cham Itai geteo:

—¿Tzet yuj xan max ach tit jetok ach ti'? Watx' mi ta chach meltzoji, cax chach can yetok junxa ac' rey ok ocok, yujtol tx'ok conobal ach. ²⁰Toltoc'al max ach jayi, man watx'ok ta chi wak' pural a toj jetok, wal yel ayin ti' man wojtakok bay chi ca in toji. Yelxac'al watx' tol chach meltzoji. Itok eb nak et conob ti' etok, axa Jehová ok yak' watx'c'ulal e yiban yin tojbalk'inal, xi cham rey tu'.

²¹Max tak'wi cham Itai:

—Chi wak' in ti' satak Dios mamin rey, cax chi waloni, tzanc'al bay chach toji, tac'al watx', ma yob, ma camich, ok inc'al tok etok, xi cham Itai.

²²—Yunokab xin, tonek, xi David.

Xan max tojc'al cham Itai yetok cham rey David yetokc'al eb ajun yetok c'al is yuninal c'al eb xal yistzil. ²³Masanil anima max ok'i yet max yilon eb toj cham rey yetok is soldado. Max ec'tok eb bay yul a' Cedrón cax max tojcan eb bay yul is beal tz'inan tx'otx'. ²⁴Tzakan oc Sadoc yetokc'al masanil eb levita. Ibil oc te cañail trato Dios yuj eb, cax max apni c'apax oc Abiatar. Max yaon ay eb te caña tu' masantac'al max yal lajwi eltok eb anima max toj yetok cham rey tu' bay xol conob. ²⁵Max yalon cham bay Sadoc:

—Meltzojanek bay yul conob yetok te cañail trato Dios ti'. Ta ok oc Cham wetok ok in meltzajok, cax ok wilon apnok te' bay is cajlobal Jehová. ²⁶Ta c'amxa tzalojc'ulal Jehová wetok xin, yunokab bay chi cha c'ul win, xi cham David.

²⁷Max yalon pax cham rey junelxa bay cham sacerdote Sadoc:

—Ach chekbej Dios, meltzojan yetok Abiatar c'al cawan e c'ajol ti' e yetok yin junc'ulalil. Itok a c'ajol Ahimaas, c'al Abiatar chi yi c'apaxtok is c'ajol, a ton Jonatán, ²⁸yak'ban ayin ti' xin, ok in cancan bay taxbal bay chi tojcan beal tz'inan tx'otx', masantac'al ok jay k'umal e yuj cayti' tzetbil yayji ocok.

²⁹Max lajwi tu xin, cax max meltzoy cham sacerdote Sadoc yetok Abiatar bay conob Jerusalén yetok te cañail is trato Jehová, cax max cancan eb bay tu'. ³⁰Caw wal chi ok' cham rey David yetok masanil eb tzunan oc yintak, cax chi ajtok eb bay witzal Olivo, c'am is xanab cham ayocok, ayaj k'oxil is jolom yetok eb ajun yetok yuj tx'oxon el eb is cusc'ulal. ³¹Max al-lay bay cham rey tol a Ahitofel ajc'ul oc yin, yetbi ba yetok Absalón, cax max oc ijan cham k'anon bay Jehová yet chi etax el tzet yetal nabil yuj Ahitofel tu'.

³²A yet max ajapnok cham rey David bay jolom witz Olivolak, max oc yin ayilal bay Dios. A bay tu' max elol cham Husai arquita is yamigo, ul chaoni, tzilquixtakxac'al is pichil cax ayajtok tx'otx' xol xil is jolom.

³³Cax max yalon cham rey bay:

—Ta chach toj wetok axca tol ok ach oc tz'akilok yalil tzet ayoc wiban.

³⁴Palta yelxac'al mi watx' tatol chach meltzoy bay Jerusalén cax chalon bay Absalón: Mamin rey, ayin ti' chin cancan a chekbejok axca max yun woc chekbejok a mam, ta cachi. Caytu' ok yun a colwaj ochontok is nabal Ahitofel. ³⁵A bay tu' max can eb sacerdote Sadoc c'al Abiatar. Tzanc'al tzet chab yal-lay bay yul despacho tu' ayman chal bay eb. ³⁶A tu' ay c'apax Ahimaas c'al Jonatán is c'ajol eb cawan tu'. Ta ay tzet yetal chabej, al bay eb, axa eb tu' chi je yalontek ayin, xi cham rey bay cham Husai.

³⁷Yuj tu' xan max meltzoy cham Husai bay Jerusalén, a wal yapni oc Absalón bay yul conob tu' yet max apni oc cham Husai.

Cham rey David c'al Siba

16 ¹Ato wal yec'tok cham rey David bay jolom witz tu', max eltek Siba is chekbej Mefi-boset chaoni. Ibil oc cac'on no burro yuj. Ayoc is tz'um no', ay ajtok 200 ixim pan yiban no' c'al 100 c'oxox uva, 100 te sat lobejal te' tol k'an wali, yetok jun netal vino nojnak. ²Max k'anlen cham:

—¿Tzet yetal juntzan ibil oc oj tu'? xi bay.

Cax max tak'wi Siba:

—A no burro ti', ok ikon eb etbi yetok oninal, mamin rey. Axa ixim pan c'al te lobejal te' ti', yet eb a soldado, axa pax vino ti' ok yuc' eb chi c'unbi yuj beyil bay tz'inan tx'otx' ti'. A eb ok uq'uenok, xi Siba.

³—¿Baytal ay Mefi-boset is yitxiquin ajawil Saúl tinani'? xi cham bay.

—Max cancan bay Jerusalén, yujtol chi na' talaj ok oc yin reyal axca max yun is mamicham yuj eb israel, xi Siba.

⁴—Yunokab axca tu', a tinani' a masanil is tzetak yetal Mefi-boset ocokabcan etok, xi cham bay.

—A chekbej in mamin rey, watx'okab in yul a sat, xi Siba.

⁵A yet max apni oc cham rey David bay Bahurim, max eltek jun winak chi yik Simei, is c'ajol Gera, tol ayto yuj ba yetok rey Saúl, ⁶cax max c'oli bajwaj yin cham rey David c'al k'okwajtok yin, c'al yin eb ayoc yin opiso yetok, oyan oc eb soldado c'al eb anima yin cham. Chi yalon Simei:

7—Elan cayti', caw wal yob ach, mak'om ach cam anima. ⁸A tinani' lanan a chaon pak yuj Jehová yuj jantak eb yinatil Saúl max a mak' camok, asan yuj occan reyal is q'uexelok. A tinani' mayal yaoc Jehová ekbej yul is k'ab a c'ajol Absalón. Yob et tinani' yujtol mak'om ach cam anima, xi bay.

⁹Cax max yalon Abisai is yune' xal Sarvia bay cham rey David:

—¿Tzet yuj xan chi bajwajtok jun lajan axca camnak tx'i ti' en, mamin rey? Cha in tok yet chi toj in tzoq'uul jolom, xi bay.

¹⁰Max yalon cham rey bay:

—A jun tu' c'am e yalon e yet yin, ayex yune' ex xal Sarvia ti'. Ta chin bajlay yuj, a mi Jehová chi ak'on yala'. Ta axca tu', c'amc'al mac chi je' tenon oc wanajok, xi rey David.

¹¹Max toj t'anan cham yin Abisai c'al yin eb ayoc yin opiso yetok, max yaloni:

—Toltax a in c'ajol chi yochej chin is mak' camok, akxa wal nak yinatil Benjamín tu'. Bajwajokabi, yamita a' Jehová chi ak'on yunej. ¹²Talaj c'uxan chi cus c'ul Jehová win, chi yak'on watx'c'ulalil win q'uexelok yuj chin bajlay ti', xi cham.

¹³Cax max tojc'al rey David yetok masanil mactxel tzakan oc yintak, ac'ala' axca tu' max yun c'apax Simei, max beyc'al toj bay yiban is tz'eyil cham rey tu', cax chi k'okwaj aytek bay yiban, c'al bajwajtek yin, cax chi tiñontek pokok yin eb. ¹⁴A yet max apni oc rey David yetok masanil eb tzunan oc yintak bay ti a' Jordán, caw wal c'unbinakxa eb, xan max xew eb bay tu'.

Ocnak Absalón bay yul conob Jerusalén

¹⁵Max oc Absalón yul conob Jerusalén yetok masanil eb israel ajun yetok c'al yetok Ahitofel. ¹⁶Max apni c'apax cham Husai arquita is yamigo cham rey David; caw wal chi awji cax max bet chalay Absalón yuj:

—Viva, viva cham rey, xi.

¹⁷Max k'anlen Absalón:

—¿Tom axca tu' ok ot a c'ul yin amigo? ¿Tzet yuj xan maj ach tok yetok? xi bay.

¹⁸—Man mojok chin toj yetok. A mactxel sic'bil yuj Jehová c'al conob Israel, a yetok ok in cancanok. ¹⁹Yetok c'apaxok ayc'alta' mactxel ok wikej is chekbanil, a ton is c'ajol wamigo tu'. Yuj tu' xan chin oc a chekbejok, axca wal max yun wiken is chekbanil a mam, xi cham Husai.

²⁰Janiq'uiuxto wal tu' cax max k'anlen Absalón bay cham Ahitofel:

—¿Tzet cachi ach ti', tzet watx' chi juney? xi bay.

²¹Max yalon cham:

—A tzet chon tinani' tol chach way yetok eb xal cab yistzil a mam aycan taynen yatut, yet watx' chi nachaj el yuj masanil eb israel ti', tol caw wal yob ach yul sat a mam tu', axca tu' ok yun yaon wal oc eb nak tzunan entak ti' is c'ul en, xi cham Ahitofel.

²²Max lajwi tu' cax max watx'nelay aj jun mantiado bay yiban despacho, cax max octok Absalón tu' way bay yul tu' yetok eb xal ix

tu'. Satak wal masanil conob Israel max octok yetok eb xal. ²³A yet jun tiempoal tu' ta a bay cham Ahitofel chi k'anlej eb junok nabalej, axq'uijan tol a bay Dios chi k'anlej eb, yuj tu' a' max yaoc rey David yipok c'ul, ac'ala' max ya c'apax oc Absalón yipok c'ul.

Etnebiltok nabalej max yak' cham Ahitofel yuj cham Husai

17 ¹Max lajwi tu xin, cax max yalon cham Ahitofel bay Absalón: —Matawal chi cha a c'ul in sic'on el 12,000 eb soldado, cax chin toj yintak David wal yet jun ak'bal ti', ²yak'ban c'am yip yuj c'unbilal. Cax ok in oc yin; axca tu' ok yun in xibteni yetok masanil eb ajun yetok, cax masanil eb ok elaj c'atan cham rey, c'am junok mac chin mak' camok, asan cham rey tu'. ³Axca tu' ok yun jayoc masanil anima tu' ayach, yujtol junnej mac yowalil chak' camok, axa pax masanil eb anima xin, chi oc eb yin junc'ulalil etok, xi cham Ahitofel.

⁴Caw wal max cha c'ul Absalón jun nabalej tu' yetok masanil eb yicham winakil conob Israel. ⁵Max yalon c'apaxok tol watx' chi awtelay c'apax cham Husai arquita yuj yak'on junok nabalej. ⁶Axa yet max apni oc xin, max yalon Absalón:

—A is nabal Ahitofel tix wal yoc ti' palta ζtzet pax xi a nabal ach ti'? ζaxca mi tu' chi junej, ma c'amak? xi bay.

⁷Max tak'wi cham Husai:

—A wal yet junel ti' caw wal man watx'ok is nabal Ahitofel tu'. ⁸Ach ti' caw wal ojtak tol a' a mam mimanbil yin owal yetok masanil eb nak ajun yetok. A tinani' yelxac'al mi aytek yowal yetok eb nak ajun yetok tu', axcac'al mi junok txutx oso chi ilay el yune' bay. Yetok c'apaxok, a' a mam tu' caw wal aj nabal yin owal, cax tok mi wal chi ec' ak'bal yuj xol eb anima tu'. ⁹A tinani' bay mi chi c'ubaj el ba bay junok nach'en ma bay junokxa lugar bay tu'. Yetok c'apaxok, ta chi ayc'ay jaywanok eb a soldado cami, axam wal yel k'umal tu' mayal wal ayc'ay eb soldado yet Absalón, xi mi. ¹⁰Yuj wal tu' caxc'al ay eb nak c'amc'al chi xiwi, axcac'al no mimek coj, palta yilal chi cabcon wal is c'ul eb yin axca tu', yujtol masanil eb jet conob yojtak tol a' a mam caw wal jelan yin owal, yetokc'al eb ajun yetok tu'. ¹¹Yuj wal tu xin, a' nabalej chi wak' ayach tinani', tol chi toj wajay oc masanil eb israel etok, chi tittac'al bay Dan masantac'al bay Beerseba. A eb tu' axca yarenail ti a' mar, axca wal tu' bisil eb, cax ach wal caw chach oc ikbajwomal cax chon toj yin owal, ¹²yet watx' yalc'al baytal ayic' a mam tu', cax chon ayc'ay yiban axca yayc'ay yal ak'bal yiban tx'otx'. C'amxa junok eb ayoc yetok ok colchajok. ¹³Caxc'al chi c'ubaj el ba eb bay junok conob yaloni, palta co masanil ayon israel on ti' chi ji' co lasu cax chi co jutxontek jun conob tu' yetokc'al jantak ch'en ch'en ayoc yin, cax chi co buloncantok bay yulak jobe, c'amxa junok ch'en chi can bay tu', xi cham Husai.

¹⁴Caw wal max cha c'ul Absalón yetok masanil eb yicham winakil conob Israel tzet max yal cham Husai yintak pax tzet max yal cham

Ahitofel, yujtol a Jehová max uchontok nabalej max yal cham Ahitofel tu' tol watx' yayji, yet watx' chi lowcan yin Absalón. ¹⁵Max lajwi tu xin, cax max toj cham Husai yalon bay eb cham sacerdote Sadoc c'al Abiatar tzet nabalejal max yak' cham Ahitofel bay Absalón, max yalon c'apax tzet nabalejal max yak'a', ¹⁶yuj toj yalon eb yab cham rey David yin aymanil, tol c'am chi cancan eb bay tz'inan tx'otx' palta tol chi ec'tok eb bay junxa k'axepal a' Jordán yet watx' c'am chi mak'lay cam eb.

¹⁷Axa pax Jonatán yetok Ahimaas ata tu' ay eb bay chi ajol nuk'a' Enrogel, tilak el conob, yet watx' c'am mac chi ilon yec' eb bay yul conob tu'. Axa jun ix chekbej max bet alon bay eb yin ewantakil tzet yayji. Maxc'al wal yab eb cax max toj eb yalon bay cham rey David. ¹⁸Palta max il-lay eb yuj jun ach'ej, axa jun tu' max bet alon bay Absalón, palta max nachaj el yuj eb, xan max toj eb bay yatut jun winak cajan bay Bahurim, cawilal tu'. Ayman max c'ubaj el ba eb bay jun olan ay bay yamak'il jun na tu'. ¹⁹Cax max toj xal yistzil cham aj na tu' makchen ti' jun olan tu' yetok jun k'ap cax max secontok ixim bak' trigo yiban, yet man txequelok. ²⁰A yet max apni oc eb is chekbej Absalón max k'anlen eb bay xal:

—¿Baytal ay Ahimaas c'al Jonatán cayti'? xi eb.

Max tak'wi xal axca ti':

—Mayaltax ec'tok eb nak cayti'. Mayal xam k'axpoj ec' eb bay jobe, xi xal.

Cax max tzakloj eb yintak eb nak cawan tu' yaloni, axa yet max yilon eb tol c'am eb nak chi toji, max meltzoy eb bay Jerusalén. ²¹A yet mayal toj eb tu xin, cax max ajtek Ahimaas c'al Jonatán bay yul olan tu', max toj eb yalon bay cham rey David tol chi k'axpoj bay a' Jordán yetok masanil eb ajun yetok tu', yujtol mayal ak'lay is c'ul Absalón yuj cham Ahitofel tol chi tit eb yak'on owal yin eb. ²²A yet max yaben cham rey David axca tu', cax max aj lemnaj yetok masanil eb nak ajun yetok, cax max k'axpoj ec'tok eb bay yul a' Jordán. Axa yet max k'inibi aj yet junxa c'ual, c'amxa mac ayic' bay k'axepal ec'tek a' tu'. ²³A yet max yilon cham Ahitofel tol c'amc'al chi oc yopiso nabalej max yak'a', max yaon oc tz'um no' is chej, cax max pax bay yatut bay is conob bay max alji, cax max watx'nen can yunal masanil is tzetak yetal. Max lajwi tu' cax max t'unban aj ba. Axca tu' max yun cam Ahitofel, cax max mukay bay mukan is mam.

Apninak cham rey David bay Mahanaim

²⁴A tu' max apni oc cham rey David bay Mahanaim, cax max k'axpoj c'apax Absalón bay a' Jordán yetok masanil eb israel. ²⁵A Amasa max yaoc Absalón yin yajawilok eb soldado is q'uexelok Joab. A Amasa tu' c'ajol jun ismaelita chi yik Itra. Max yi' Itra tu' jun ix chi yik Abigail yune' Nahas nuej ba yetok xal Sarvia is txutx Joab.

²⁶A tu' max watx'nej aj Absalón is campamento yetok eb israel bay yul yet Galaad. ²⁷A yet max apni oc rey David bay Mahanaim, ayman max eltek Sobi c'ajol Nahas aj Rabá yul yet Amón chaoni. Yetok c'apax Maquir

c'ajol Amiel aj Lo-Debar, c'al Barzilai aj Rogelim yul yet Galaad. ²⁸Ibil oc wayubej yuj eb, yetok palangana, c'al tx'otx' xij, ixim trigo, ixim cebada, ixim harina c'al ixim trigo k'anbinak, an ubal c'al yetok garbanzo, ²⁹yetok yal cab, no queso, no crema, c'al yetok no calnel. A masanil juntzan tu' max yitok eb lo' cham rey David yetokc'al masanil eb ajun yetok. Yujtol petoj cham yetok masanil eb anima tu' bay takin tx'otx', yuj tu' xan max na eb tol chi c'unbi eb, chi tak ti' eb, c'al ay wajil eb.

Camichal Absalón yin owal

18 ¹Lajwi tu' cax max c'oli yilon cham rey David masanil eb is soldado, axa yaon oc is yajawilal junjun mil c'al junjun cien soldado. ²Ox makan max yun pojaxtok eb soldado tu' yuj. A Joab max oc yajawilok jun makan, axa junxa makan, a Abisai is yune' Sarvia, yuxtak Joab max oc yajawilok. Axa junxa makan xin, a Itai aj Gat max oc yajawilok. Max lajwi tu' xin, max yalon cham rey David bay masanil is soldado:

—Ayin jun ok in tok e yetok yin owal tu', xi.

³Cax max tak'wi eb nak:

—C'amak mamin rey, manchak ot axca tu', yujtol a eb ajc'ul tu' ach chach yuktej eb, a pax ayon ti' ta chon colchaji ma chon cam nanok on yuj eb, c'am jelapnok on, tol ec'ban ach yintak lajonebok mil on ayon ti'. Yuj tu' xan yelxac'al watx' tol chach cancan bay yul conob ti', ach ok atok tz'akil eb soldado ayon, xi eb.

⁴Yunokab xin, ok wikej bay tzet che yal tu', xi cham. Max lajwi tu' xin, max bet oc lecan bay ti' puertail conob cax chi yilon yelteq eb soldado yin bulquixtakil, yin junjun mil c'al yin junjun cientoal yelteq eb.

⁵Cax max cam c'ul cham rey yalon bay eb is yajawil eb soldado, a ton Joab, Abisai, c'al Itai tol yujc'al cham xan camokab tzet chi utlay Absalón. A jun max yal tu', masanil eb soldado max abeni. ⁶Lajwi tu' max toj eb masanil yin owal yin eb ayoc yetok Absalón.

A tu' max chalej ba eb bay xol k'aktelak yet Efraín. ⁷Max ayc'ay eb ayoc yetok Absalón yuj eb ayoc yetok cham rey David. Caw wal xiwil eb max cam yet jun c'ual tu', 20,000 eb max cami. ⁸A xol masanil k'aktelak tu' max oc owal, cax yelxac'al miman anima max cam yuj max c'aytok xol k'aktelak tu' yintak eb max tzoc'lay camok. ⁹Ayajtok Absalón yiban jun no mula. A yet max chalen ba yetok eb soldado cham rey David, max meltzoy yintak, axa yec'tok no chej tu' yalan is k'ab jun te matx'ji, cax max oc cantok jek'naj is nuk' nan xol is k'ab te', max can t'unanok, axa no chej tu' max tojc'al no'.

¹⁰C'uxanc'al ay jun nak max iloni, max toj yalon bay Joab axca ti':

—Jekan cantok is nuk' Absalón yul nan is k'ab jun te matx'ji, max wiloni, xi.

¹¹Max tak'wi Joab bay:

—Tatol max el axca tu', ζtzet yuj xan maj a watx' mak'nejxac'al camok? Yetok wal masanil in c'ul cax chi wak'on lajonebok siclo ch'en plata ayach yetok jun cinturón, ξi Joab.

¹²Max tak'wi nak tu' axca ti':

—Caxc'al mi chak' milok ch'en plata tu' ayin, maje'al waoc in k'ab yin is c'ajol cham rey, yujtol max jab wal tzet max yut yalon cham rey tu' ayach c'al bay Abisai c'al bay Itai, tol c'am chi mak'lay cam Absalón. ¹³Yetok c'apaxok ta max in mak' camok, chi mi low win yujtol c'am junok tzet yetal tol man ok yojtaknej el cham rey, tamwal tol ok into a colil ach ti', ξi bay.

¹⁴—ζTzet wal chi oc chi ec' in tiempo etok? ξi Joab. Cax max yiontok oxeb coc'tak lanza cax max bet tek'on oc yin pixan Absalón, yujtol iquisto. ¹⁵Lajwi tu' max jitzon oc ba lajonwan is soldado Joab, cax max watx' mak'nenxac'al cam eb Absalón. ¹⁶Max lajwi tu xin, cax max yalon Joab tol chi xulay trompeta yet chi oc wanaj eb soldado tzakloj yintak eb yet israelal eb. ¹⁷Max lajwi tu' max yiontok eb is mimanil Absalón cax max bet yaon aytok eb bay yul jun olan bay xol k'aktelak tu', cax max tojcan jun miman bulan ch'en yiban yuj eb. Axa pax eb is soldado maxto can xin, max el eb, axa paxcantok eb bay yatut junjun.

¹⁸A yet iquisto ec' Absalón tu' max yak'on watx'jok jun monumento bay jun lugar chi yik jobeal yet eb cham rey. Is bi max yaoc yin, yujtol c'am junok is c'ajol chi ak'on can binajok; masantac'al tinani' chito binaji tol is monumento Absalón.

¹⁹Axa Ahimaas c'ajol cham Sadoc, max yal bay Joab:

—Chi wal ayach, cha in tok yet chi toj wal bay cham rey tol a Jehová mayal colon el yul k'ab is yajc'ul, ξi Ahimaas.

²⁰Max yalon Joab bay axca ti':

—Maj je' a toji, man a mojak ach ok tok al jun k'anej tu', yamita yet junokxa tiempoal ok ach tok, palta tinani' c'amak, yujtol a wal caw is c'ajol cham rey max cami, ξi Joab bay.

²¹Max lajwi tu xin, max yalon Joab bay jun soldado aj Etiopía:

—Asi', al bay cham rey tzet max el tu', ξi Joab.

Max ay nojnaj nak etíope tu' satak Joab, max lajwi tu' max toj lemnaj yalon bay cham rey tu'. ²²Max yalon pax Ahimaas bay Joab:

—Elok wal yin a c'ul, cha in tok yintak nak etíope tu', ξi bay.

Max tak'wi pax Joab axca ti':

—ζTzet wal yuj xan chochejxac'al chach toji, tokwal ay tzet ok e' yin jun k'anej tu'? ξi Joab.

²³—C'am yelapnok, caxc'al c'am tzet chi wi' yin, palta chin toj lemnajok, ξi bay.

—Asi xin, ξi Joab.

Yet wal jun bek tu' cax max toj lemnaj Ahimaas, bay ac'al, max babjitok satak nak etíope tu'. ²⁴A tu' chotan ay cham rey David bay nan xol puertail conob, axa pax jun makwajwom xin, a tu' ayic' bay pananil

yiban muralla bay ayoc puerta tu'. T'anantok jun tu' max yilon tit jun winak tx'oklil yin anejbail. ²⁵Ayman max awji yin ipejal, max yaloni tol ay jun winak chi jayi. Max yalon cham rey:

—Tatol is tx'oklil, alom watx' abix chi yal tu', xi cham.

Yak'ban cawilxa jayoc nak tu xin, ²⁶max yilon nak makwajwom tu' tit junxa winak yin anejbail, cax max awji bay nak taynem puerta:

—Ay wal junxa winak chi tit yin yanej, xi.

—Ac'ala' junxa tu' abix chi ul yala', xi cham rey.

²⁷Max yalon nak makwajwom:

—A jun babel tu' axca wal bey Ahimaas is c'ajol Sadoc chi wila', xi.

Axa tak'wi cham rey tu':

—Ta a nak tu', watx' is nabal nak, watx' mi tzet ok ul yala', xi cham.

²⁸A yet max jayoc Ahimaas satak cham rey max ay nojanok cax max yak'on cawil c'ul, max yalon axca ti':

—Al-layokab watx' k'anej bay Jehová co Diosal mamin rey, yujtol mayal c'aylay el yuj Cham eb max meltzoy oc ajc'ulal en, xi.

²⁹—¿Watx' mi is c'ul Absalón max ela'? xi cham rey.

Max tak'wi Ahimaas axca ti':

—Toxac'al chi bululi anima yet max in cheklaytek yuj a chekbej Joab, majxa wabej tzet max uji, xi.

³⁰Max lajwi tu' max yalon cham rey:

—Ec'antok bay jun pac'xa ti'. A tu' chach occan lecan bay tu', xi David.

Max yiken yoccan lecan bay tu'. ³¹Lananto wal tu' max apni oc nak etíope, max yalon axca ti':

—Mamin rey, cha' jun watx' abix chi ul wal ayach: Mayal paktzej Jehová bay eb max meltzoy oc ajc'ulal en, xi nak.

³²Cax max k'anlen cham rey bay nak:

—A pax nak ach'ej Absalón ¿watx' mi c'ul nak? xi cham rey.

Max tak'wi nak:

—Mamin rey, tolok wal chi cam masanil eb ajc'ul oc en axca max yun lajwi el nak tu', xi nak.

³³Max oc pitz'an yin c'ul cham rey David, max toj bay yul junxa cuarto can bay yiban puertail conob tu'. Yak'ban chi bey yajtok, chi yaloni: ¡Ay ach in c'ajol Absalón! ¡Ayinok wal max in cam a q'uexelok! ¡Ay ach in c'ajol Absalón! xi cham.

19 ¹⁻⁴Max yaben eb anima tol chi ok' cham rey David, c'al tac is c'ul yuj Absalón is c'ajol, yuj tu' xan, a jun tzalojc'ulal yuj max je' yuj yak'wi owal, max meltzoyocan oc yin cusc'ulal. A eb soldado max bet yin owal tu' yinxac'al q'uixwiltakil c'al ewantakil max yun jayoc eb nak bay conob tu' axcaxac'al tol max el eb bay eb ajc'ul. Axa pax cham rey David xin, makan el sat cax chi el yaw: ¡Ay ach in c'ajol Absalón! xi. ⁵Axa yet max yaben Joab, max toj il-lay cham rey yuj bay yul is cuarto tu', max yalon axca ti':

—A tinani' lanan aon oc eb a soldado yin q'uixwilal, max lajwi ach colon el eb yetok onenal c'al yetok eb estzil. ⁶Axa tinani', lanan a tx'oxon elok axca tol c'am yelapnok eb ayoc yin opiso ti' c'al eb soldado yul a sat, axca wal tol yelxac'al chi cus a c'ul yin mac chach yajoni, cax c'am yelapnok yul a sat eb chach ocheni. A tinani' chi nachaj el wuj, yel mi watx' chabej ta a Absalón tu' maj camok, axa ayon ti' co masanil max on cami. ⁷Yuj tu xin, elantok cax chak'on mimanil is c'ul masanil mac ayoc etok, yujtol wojtak wali tatol man ok ach eltok, c'amxa junok mac ayic' etok cax ok k'inibok ajok. Caw wal yelxac'al yob tzet ok jay eban tinani' yintakc'al tzetak max jay yettax ach'ej ach ocok, xi Joab.

⁸Yuj tu' xan max eltok cham rey David, cax max bet ay chotan bay ti' puertail conob. A yet max yaben masanil eb ayoc yetok, max toj eb tx'oxon ba bay satak.

Meltzojnak cham rey David bay conob Jerusalén

Axa pax eb israel ayoc yetok Absalón xin, yinxax elilal max yun paxtok eb bay yatut. ⁹Masanil eb tribunal Israel chi yal eb yin junjunal axca ti': A cham rey max on colon yul k'ab eb ajc'ul ma wal axca eb filisteo, axa tinani' xin, elilal chi yun bay is c'ajol Absalón. ¹⁰Axa pax Absalón max jaoc co reyalok xin, mayal cam pax nak bay xol owal tu'. ¿Tzet chi jechbanej xan c'am chi ji paxtek David co reyalok? xi eb.

¹¹A masanil juntzan k'anej chi yal eb israel tu', max al-lay yab cham rey David. Yuj tu' xan max chektok cham al-lay bay eb sacerdote Sadoc c'al Abiatar tol k'anlej el bay eb yicham winakil conob Judá tzet yuj xan chi ec' tiempo yilaytek cham rey yuj eb bay despacho. ¹²K'anlejek bay eb tzet yuj xan puralxac'al chi yal eb yet chin meltzoj bay in despacho junelxa. Nabaxac'al tol wican in ba yetok eb nak cax junej tribunal on, quex chi bay eb, xi. ¹³Maxto yal David tol chi toj al-lay bay Amasa: Axca ach ti' jicanto co ba etok, yuj tu' a yet ok beytok ti', ach chach oc is yajawilok eb soldado is q'uexelok Joab. Ta c'am chi yun tzet chi wal ti', jayokab oc yailal wiban yuj Dios, xi David.

¹⁴Xan max tzalojbi aj c'ul eb aj Judá, tol max junanej ba is nabal eb, max yalontok eb bay cham rey tol chi meltzojtek yetok masanil eb ayoc yin opiso yetok. ¹⁵Maxc'al wal apni oc k'anej, max tit cham rey David, max jayoc bay ti a' Jordán. Ac'ala' c'apax eb aj Judá max jayoc eb bay Gilgal yet chi chalay ec'tek cham yuj eb bay yul a' Jordán tu'. ¹⁶Axca tu' c'apax Simei is c'ajol Gera yin is tribunal Benjamín aj Bahurim, ayman max oc xol eb aj Judá, max ul chalay David yuj, ¹⁷tzakan oc mil soldado yinatil Benjamín yintak. Ac'ala' c'apax Siba chekbej yayji oc bay is yinatil Saúl, tzakan oc olajonwan is c'ajol yintak, yetok junc'alwan is chekbej, babel max apni oc eb ti a' Jordán satak cham rey David tu'. ¹⁸Ayman max k'axpoj ec'tok eb yul a' tu' yet chi toj yiec'tek eb, eb xal yistzil c'al eb yuninal cham rey tu', cax max colwaj yin tzanc'al tzet yetal is cawxinakil. A yet toxa wal chi k'axpoj ec' cham rey bay yul a' Jordán tu', max apni oc Simei, cax max ay nojan satak. ¹⁹Max yalon axca ti':

—Chin tewi ayach mamin rey, tol chak' mimanc'ulal win yet c'amxa cha natek in mul ayin a chekbej in ti' max waoc ayach, yet max ach el bay Jerusalén. C'amokab chi tit owal win. ²⁰Chi wojtaknej elok tol yob max wut in ba, yuj tu' xan a yin masanil is yinatil José, ayinc'al babel max in jay ul ach in chaon mamin rey, xi Simei tu'.

²¹Yuj tu' xan max yal Abisai is yune' xal Sarvia:

—¿Tom man mojob cam jun Simei ti', yujtol caw wal yob max yal yin cham rey sic'bil el yuj Jehová? xi.

²²Cax max tak'wi cham rey David axca ti':

—¿Tzet wal e yoc ayex yune' ex xal Sarvia ti' yin jun k'anej ti'? Manchakxac'al e som in c'ul. A tinani' wojtakxa tol ok in oc pax reyalok eb wet israelal, yuj tu' c'am junok mac chi je' cam yul co conobal ti' tinani', xi cham. ²³Max yalon bay Simei:

—Chi wak' in ti' bay Jehová tol c'am chach cami, xi.

²⁴Ac'ala' c'apax Mefi-boset is yitxiquin Saúl, max eltek chaon cham rey. Yettaxc'al max toj cham rey tu' elok, masantac'al yet max meltzoj yin watx'c'ulalil, c'am wal junelok max tx'aj Mefi-boset tu' yakan, tamwal xil is ti' majc'al tzukilok, cax majc'al q'uex is pichil. ²⁵A yet max chalen ba eb bay Jerusalén, max yalon cham David bay Mefi-boset:

—¿Tzet yuj xan maj ach tok wetok? xi bay.

²⁶Max tak'wi Mefi-boset:

—Mamin rey, yujtol man wal watx'ok yayji oc wakan, xan max wal bay in chekbej Siba tol chi yaoc tz'um no in burro cax chin oc yiban no', axa in toj etok tu' waloni, palta maj yikej. ²⁷¿Tzet xam max naaj yalon aj win ayach? Palta axca wal junok yángel Dios, caywal tu' ayji mamin rey. Yunokab tzet chi cha a c'ul. ²⁸Caxc'al masanil is yinatil wichmam moj tol mayal ak'lay camok, palta ach ti' max in awtej low etok bay a meña, xan c'amxa tzet watx' waloni, xi Mefi-boset. ²⁹Max yalon cham rey bay axca ti':

—C'amxa tzet watx' chi jal xin, mayal in na' asan tol cha pojay nan tx'otx' tx'otx' en yetok Siba, xi cham rey.

³⁰Max tak'wi Mefi-boset:

—Canokabcan Siba yin tx'otx' masanil, asan tol watx' max yun a meltzoj bay a despacho junelxa, xi bay.

³¹Axa pax Barzilai aj Galaad, max tittac'al bay Rogelim cax max ul yilon k'axpojcan ec'tok cham rey David c'al tak'encanok. ³²Caw wal icham winakxa cham Barzilai tu', ayxa 80 abil is k'inal. A yet max ayji ec' cham rey David bay Mahanaim max bet yak'c'al tzet chi lolay bay cham rey tu', yujtol caw wal beyom cham. ³³Max yalon cham David bay axca ti':

—Ton wetok bay Jerusalén, ayin ok ach in lotzej, xi bay.

³⁴Max tak'wi cham Barzilai:

—Jayebxanej abil iquis in, cax okto wal in tok etok bay Jerusalén. ³⁵Ayxa 80 abil in k'inal, c'amxa chi wab chial tzet chi co lo' c'al tzet chi juq'uej, c'amxa chi

je' wiloni ta watx' ma c'amak, cax c'amxa chi wab bitni eb nak chi bitni c'al eb ix chi bitni. Toxac'al mi chin oc tz'akilok a bilc'ulal mamin rey. ³⁶Asannej tol chin k'axpoj ec'tok yul a' Jordán ti' cax chin toj janic'okxa etok, cax chi wilon a tojcanok. ¿Tzetto wal yuj xan chala' tol chin toj etok bay Jerusalén yuj is paktzebalok in watx'c'ulal? ³⁷Yuj tu' xan elok yin a c'ul, chin a cha meltzoy bay watut, asanxanej tol chi wechbanej in cami, cax ok in muklay bay mukan in mam c'al in txutx. Asan wal xin, ay jun a chekbej chi je' eontok mamin rey, a ton nak in c'ajol Quimam ti', itok cax chak'on a watx'c'ulal tu' yin nak, xi cham Barzilai.

³⁸Max yalon cham rey David:

—Tokab nak Quimam tu' wetok xin, ta xi a c'ul. Yunokab axca tu'. Tzanc'al tzet cha k'ana' ok wikej ayach, xi cham.

³⁹Masanil eb ajun yetok cham max k'axpoj ec'tek bay yul a' Jordán, axa yet max k'axpoj cham rey David xin, cax max tz'uboncan el is ti' cham Barzilai, max tak'licanok cax max meltzoy cham Barzilai tu' bay yatut. ⁴⁰Max toj cham rey bay Gilgal, tzakan oc nak Quimam yetok masanil eb aj Judá, cax tzakan c'apax nanxa eb Israel.

⁴¹Masanil eb conob Israel max bet ilon cham rey, max yal eb bay axca ti':

—¿Tzet yuj xan tol asan eb jet conob yinatil Judá max ach iontek, max ach yion ec'tek eb bay yul a' Jordán yetok eb xal etbi c'al yetok eb oninal, c'al yetok masanil eb a chekbej? xi eb.

⁴²Masanil eb aj Judá max tak'wi bay eb yet israelal eb tu':

—Yujtol a cham rey ti' jicantoc'al co ba yetok, xan c'am chi je' chi tit e yowal yuj jun ti'. ¿Tokwal tol a yuj cham rey ti' cax ok on lowok, tokwal ay janic'ok tzet yetal ok ji' yin? xi eb.

⁴³Max tak'wi eb yet israelal eb tu' bay:

—Caxc'al mi axca tu' palta ayon ti' lajoneb tribual ec'ban on e yintak ayex ti', yuj tu' xan caw wal ay jalon jet yin cham rey David ti' e yintak. ¿Tzet yuj xan chon e yintaknej elok? ¿Tokwal maonnak ayon ti' max jal yin babelal tol chi meltzotek co reyal? xi eb.

Palta xin, a eb aj Judá yelxac'al ya' tzet max yal eb yintak juntzanxa yet israelal eb tu'.

Yuchnak aj bulnaj Seba eb conob

20 ¹Ay jun winak yelxac'al yob yin is tribual Benjamín, chi yik Seba. A jun tu' is c'ajol Bicri, a tu' ayic' bay Gilgal. A' max xunon is cacho, max yuchon aj bulnaj conob, max yaloni: Ayon ti' c'amc'al jalon jet, tamwal ay co satak yetok David jun c'ajol Isaí ti'. Tonek bay jatut co masanil ayon israel on ti', xi bay eb.

²Yuj tu' xan, max beklaycan cham rey David yuj eb yet israelal tu', axa tzakloj eb yintak Seba is c'ajol Bicri tu'. Axa pax eb soldado yin yinatil Judá xin, tzakanc'al eb yintak cham rey max tite'al eb bay ti' a' Jordán masantac'al bay Jerusalén.

³A yet max jayoc cham rey David junelxa bay yatut bay Jerusalén, max yiontok eb xal lajonwan cab yistzil aycan taynemalok yatut, max cancán eb yuj bay jun na yet chi taynelay eb xal. Ac'al bay tu' max lotzelay eb palta c'amxac'al bay max way cham yetok eb. A bay tu' max makayc'alcan eb xal axca eb xal ix tol c'amxa yichamil, masantac'al max yal cam eb.

⁴Lajwi tu' max yalon cham rey bay Amasa:

—Awtej masanil eb winak yet Judá, yet wal cabej tinani' cax chach jayoc yetok eb cayti', xi cham rey.

⁵Yuj tu' max toj Amasa wajban oc eb, palta max ec' tiempo, maj jay axca wal c'ual max al-lay tu'. ⁶Axa yalon cham rey David bay Abisai:

—Tekan yelxac'al ok on yetnej Seba ti' yintak axca max yun Absalón. Yuj tu' xan ikbaj masanil eb in soldado, tzaklojan yintak, axa talaj chi yunej tol chi yak' c'ul juntzan conob tol ayoc is murallail, cax chi elaj ayon, xi.

⁷A masanil eb soldado yet cham Joab yetok eb cereteo c'al eb peleteo, a ton eb taynemal cham rey, yetok juntzanxa eb soldado caw wal jelan, max el eb bay Jerusalén, max toj eb yetok Abisai, yuj tzakloj eb yintak Seba. ⁸A yet max apni oc eb bay cawilal jun miman sat ch'en ay bay Gabaón, a tu' max eltek Amasa satak eb. Axa cham Joab ayoc is pichil yet owal, c'albil is nan yetok jun cinturón. Axa bay is tz'eyil tu', a tu' jekan aytok jun ch'en espada yul tz'umal. A jun tu' max ayc'ay c'otnajok yet max yak'on yip toji. ⁹A yet max yaon oc cham Joab is watx' k'ab yin xil is ti' Amasa yuj tz'ubon is ti', max k'anlen bay:

—¿Watx'c'al mi max yun elocok? xi bay.

¹⁰Palta a Amasa tu' c'am chi na yuj ch'en espada ibil oc yuj Joab tu', yuj tu' xan a cham Joab ayman max tektok ch'en yul is c'ul. Masanil yul c'ul max ay secnaj sat tx'otx'. Junocnej max yak' cham Joab tu', max cami. Lajwi tu xin, max tojc'al cham Joab yetok yuǵtak chi yik Abisai yintak Seba, is c'ajol Bicri. ¹¹A junok eb soldado cham Joab max oc waan cawilal is mimanil Amasa tu', max yaloni:

—A mactxel ayoc yetok cham Joab c'al yetok cham rey David tzaklojokab yintak Joab tu', xi.

¹²Palta a Amasa xin, max cancel al can telan yul be xol is chiq'uul. A yet max yilon jun soldado tu' tol masanilxac'al anima chi ec' bay tu' chi oc waan yiloni, xan max jitzil ti' be tu', max yaontok jun k'ap yiban. ¹³A yet mayal yican el bay ti' be tu xin, max ec'tok masanil eb chi toj yintak cham Joab, yet chi toj saylay ec' Seba.

¹⁴A Seba tu' max ec' bay masanil is tribual eb israel masantac'al max apni oc bay Abel-bet-maaca. Axa masanil eb yinatil Bicri max wajnaj oc yuj, tzakanxa eb yintak max octok eb yul conob tu'. ¹⁵A yet max apni oc eb is soldado cham Joab bay Abel-bet-maaca, max watx'nen aj eb tx'otx' walubok bay yinlak murallail conob tu', yet chi oc eb yak'on owal yin. Masanil eb max oc yuchon ay jun muralla tu'. ¹⁶A bay tu' ay jun xal ix caw wal aj nabal max awjitac'al bay yiban murallail conob tu', max yaloni:

—Abek, abek tzet chi wala', elok yin e c'ul che yal bay Joab tol chi jitztek ba. Ay tzet ok wal bay, ñi xal.

¹⁷A yet max jayoc cham Joab cawilal tu' max k'anlen jun ix tu' axca ti':

—¿Ach mi Joab ach tu'? ñi bay.

—Ayin toni, ñi cham Joab tu'.

Max yalon xal bay:

—Ab wal tzet yetal ok wal ayin a chekbej in ti', ñi bay.

—Ti' chi wabej, ñi cham Joab tu' bay xal.

¹⁸Axa yalon xal ix tu' axca ti':

—A yet payxa chi al-lay axca ti': A mac chi yochej chi yojtaknej junok tzet yetal, k'anlejokab yin Abel, ñi; axca tu' chi yun watx'ji el junok k'anej. ¹⁹A co conobal ti' a ton jun conob watx', yikem yul co conob ayon israel on ti', a ton jun conob ti' yelxac'al miman yelapnok. Palta ach ti' chi yochej a c'ul tol chak' lajwok. ¿Tzet yuj xan chi yochej a c'ul chak' lajwok tzet yetal tol yet Jehová yayji ocok? ñi xal.

²⁰Max yalon cham Joab axca ti':

—A jun tu' c'am chin na axca tu', c'am chin na tol chi wuchcan lajwok.

²¹Manak jun tu' chi co saya', palta a jun winak chi yik Seba, aj siquial tx'otx' yul yet Efraín, a jun tu' max aj wan ajc'ulal yin cham rey David. Asan jun tu' che yak' yul in k'ab, cax chin el bay jun conob ti', ñi cham.

—Ok co k'ok aytok is jolom ayach bay yiban muralla ti', ñi jun xal tu' bay cham Joab.

²²Max lajwi tu' max yalon xal bay masanil eb anima yin is yajnabalil, max tzoc'on el eb jolom Seba tu', max k'okon aytek eb bay cham Joab. Lajwi tu xin, max yalon cham Joab tol chi xulay trompeta yet chi el eb bay yin conob tu', xan max tojcan eb soldado bay yatut junjun, max meltzoy c'apax can cham Joab bay Jerusalén k'anjab yetok cham rey.

Eb is chekbej cham rey David

(2 S 8.15-18; 1 Cr 18.14-17)

²³Caytu' max yun cancan cham Joab yajawilal xol masanil eb soldado yet israel, axa pax Benaía is c'ajol Joiada, a yajaw yayji yin eb cereteo c'al yin eb peleteo. ²⁴Axa pax Adoram chi ilon mulnaj eb tol yowalil chi mulnaji, axa Josafat yajtz'ib cham rey yayji ocok, a ton is c'ajol Ahilud. ²⁵Ac'ala' Seva, a' chi tz'iben yabixal tzet chi yun cham rey. A pax Sadoc yetok Abiatar, a eb tu' sacerdote yayji eb. ²⁶A pax Ira, aj conob bay Jair, a jun tu' sacerdote yayji oc bay cham David.

Paktzebal yuj eb gabaonita

21 ¹A yul is tiempoal cham rey David ay oxeb abil wajil max yak'a', xan max k'anlej cham bay Jehová tzet yayji ocok. Max yalon Jehová bay: A jun wajil ti', a yuj e yaben yail yuj jantak anima max cam yuj Saúl yetokc'al is yinatil, yujtol max mak'lay cam eb gabaonita yuj, ñi Jehová.

²Yuj tu' max awtelay eb gabaonita yuj cham rey David yet chi k'anjab yetok eb. (A eb gabaonita tu' man israelok eb, palta tol a jun bulan eb amorreo maxto cani, bay maxax yak' eb israel is ti' tol c'am chi c'aylay el eb yuj eb. Axa pax cham Saúl xin, max yak'lej c'ayon el eb yuj is watx'ilok Israel c'al Judá yaloni.) ³Max k'anlen cham David bay eb:

—¿Tzet yetal watx' chi wun e yetok? ¿Tzet wal chi yun in paktzen ayex yuj bay max quex etaxi, yet watx' chi yak' Jehová watx'c'ulalil yiban co conob ti'? ñi cham.

⁴Max tak'wi eb gabaonita bay axca ti':

—Man tuminok c'anan can juj yetok cham Saúl yetok is yinatil, c'am c'apax chi yochej co c'ul tol ay mac chi cam bay xol conob Israel, ñi eb.

Max yalon pax cham rey David bay eb:

—Aleke ayin xin, tzet yetal che yochej chi wun e yetok, ñi.

⁵Max tak'wi eb bay axca ti':

—Chi jochej che yaoc ukwanok is yinatil Saúl yul co k'ab, a ton cham max yochej max on yak' lajwok, max na tzet chi yun co c'ayilok yet watx' c'am chon ayji ec' bay yul e tx'otx'al ayex israel ex ti'. ⁶A eb ukwan tu' ok co locbaj aj eb satak Jehová bay Gabaa is conobal cham Saúl, a ton cham sic'bil el yuj Jehová, ñi eb.

Xan max tak'wey cham rey yak'on eb tu'. ⁷Maj ak'lay Mefi-boset yul k'ab eb, yujtol a ton jun tu' is c'ajol Jonatán, yitxiquin cham Saúl, yujc'al is ti' David max yak'lej satak Jehová yetok Jonatán. ⁸Max mitx'on cham rey eb cawan yune' xal Rizpa is cutz'in Aja, a ton juntzan yune' xal tu' yetok cham Saúl, a ton eb chi yik Armoni c'al Mefi-boset. Max mitx'on c'apax eb owan yune' xal is cutz'in Saúl chi yik Merab a ton yune' xal yetok cham Adriel, a ton cham tu' is c'ajol cham Barzilai, aj Mehola. ⁹Max alay oc eb yul k'ab eb aj Gabaón. A eb tu' max locban aj eb ukwan tu' satak Jehová bay jolom witz, caytu' max yun cam eb ukwan tu' yet tiempoal wal chalay el yich jolay ixim cebada.

¹⁰Axa xal Rizpa, is cutz'in Aja, max watx'nej jun is lanchu yetok juntzan axca coxtal caw wal el bay max ayji ec' bay jolom jun ch'en ch'en bay ayic' is mimanil eb camnak tu'. A bay tu' max cancan xal yet max el yich jolay ixim cebada, masantac'al yet max jay nabil k'inal. C'am chi cha jay xal no ostoc yin juntzan mimanilej tu' yet chi ec' c'u, tamwal no' chiwajwom no' chi cha jay xal yet chi ec' ak'bal.

¹¹A yet max al-lay bay cham rey David tzet yetal chi yun xal Rizpa is yistzilben Saúl, ¹²max chekon cham toj ilaytek is bakil Saúl yetokc'al yet Jonatán is c'ajol bay conob Jabes yul yet Galaad. A tu' ay bay tu' yujtol a eb aj Jabes tu' maxax bet iontek bay cawilal txonbal yet Bet-sán, bay locan aj yuj eb filisteo, yet max lajwi mak'on cam eb xol owal bay Gilboa. ¹³Max chekon cham rey yilaytok is bakil Saúl yetok yet Jonatán, cax chi ilay c'apaxtok is bakil eb ukwan max aj locan tu'. ¹⁴Max muklay is bakil Saúl yetok yet Jonatán bay mukan cham Cis is mam Saúl tu', a ton bay Zela, yul yet Benjamín. Max yun axca yalon cham rey tu'. Lajwi masanil juntzan tu xin, max chaon c'ul Dios tzet max k'an cham rey yuj is watx'ilok conob.

A Abisai max colon cham rey David

¹⁵Max oc pax eb filisteo yak'on owal yin eb israel, xan max toj pax cham rey David yetok eb is soldado yin owal yin eb, palta a cham rey David tu xin, yelxac'al max c'unbi ajok. ¹⁶Ay jun winak chi yik Isbi-benob, yinatil eb mimek tel, a jun tu' max yochej max mak'on cam cham. A is lanza ec'ban ukeb libra yalil, axa yin is cinturón ibil oc jun ac' espada yuj. ¹⁷A pax Abisai is yune' xal Sarvia, a jun tu' max colon el cham rey David, max mak'lay cam jun filisteo tu' yuj, xan max yak' eb is soldado cham rey David is ti' tol c'amxa chi eltok cham yin ak'oj owal yetok eb, yet watx' c'am chi c'ayil mac ayok yipok co c'ul ayon israel on ti', xi eb.

Ocnak owal yetok eb mimek winak

(1 Cr 20.4-8)

¹⁸Max lajwi tu xin, max oc pax junxa owal yetok eb filisteo bay Gob. A yet jun tiempoal tu', a Sibecai aj Husa max mak'on cam Saf. A jun tu' yinatil eb mimek winak. ¹⁹Ay c'apax junxa owal yin eb filisteo, ac'ala' bay Gob tu'. A jun Elhanán is c'ajol Jair, aj Belén, a' max mak'on cam Goliat jun aj Gat. A is teal lanza jun tu' lajan yin axca te te' bay chi oc tx'al yin chembal.

²⁰A bay Gat max oc c'apax junxa owal. Ay jun winak caw wal miman is tel bay tu', yinatil eb mimek winak. A jun tu' ay lajcaweb yiximal is k'ab, ay c'apax lajcaweb yiximal yakan. ²¹Caw wal max buchwaj nak yin eb soldado Israel, xan a Jonatán is c'ajol Simea is yuxtak cham rey David max mak'on camok. ²²A canwan eb mimek winak tu' is yinatil Refa eb, a ton jun aj Gat, palta a eb tu' max ayc'ay eb yul k'ab cham rey David yetokc'al yul k'ab eb is soldado.

Bit cham rey David yuj max uj yak'on owal

(Sal 18)

22 ¹Max bitnej cham rey David jun bit ti' yet c'ual max col-lay el yuj Jehová bay yul k'ab Saúl c'al yul k'ab juntzanxa yajc'ul.

²Max yalon axca ti' yin is bit bay Jehová:

Ach Jehová, axca tol in nach'en ach, axca tol in cuartel ach, in Colomal ach.

³Ach in Diosal, in mayk'ak'al ach, a en chin col in ba. In taynemal ach, in Colomal ach tol ay epalil. Oj xan c'am chin michchaj yuj eb ajc'ul. Ach in Colomal, ach max in a col bay mac max yochej max in c'ayon elok.

⁴Ok wal in ba ayach, tol a moj wal a bitnelayi, catawal tu' ok in colchaj yul k'ab eb ajc'ul.

⁵A is may yet camich max oymoj oc win. Max jay xiwc'ulal win satak eb c'aywajwom xiwil yip.

- 6 A camich axca tol mayal c'aloc lasu win. A yolanił camich axca tol max watx'nej in yalil.
- 7 Max wal in ba bay Jehová yet ayin tok xol in some'ulal. Max in k'an colwal bay in Diosal. A bay is templo Cham max quin yabej. Max apni waw bay is txiquin Cham.
- 8 Catatu' max ec' jun miman quixcab puch ow. Yelc'ulal max bil xeałlak satcan. Max cam tziçlayi yuj yowal Cham.
- 9 Max eltek mub yul is txam, axa yul is ti' max eltek k'ak'ej tol c'aywajwom. Max eltek jul-lajbok tzak'ak' yul is ti'.
- 10 Max eltek jucnaj Cham bay satcan cax max ayolok. Mimek k'ek asun ayoc yalan yakan.
- 11 Ayaj yiban jun querubín, cax max toj jupupok, max toj batxatxok yiban cak'ek'.
- 12 Axca tol c'uan el bay tu', bay xiwil k'ekk'olinakil. Max c'ubaj el ba xol k'ek asun tol nojnak el yuj aej.
- 13 Yuj jopopial sat Cham max chawaj k'ak'al tzak'ak'.
- 14 A Jehová, Cham Axac'al Ocok, max el yaw axca wal bil c'u bay satcanlak.
- 15 Max yatok is julbal, axa eb ajc'ul max uchchajtok. Max yatok is rayo, max uktelay el eb yuj.
- 16 A yich a' mar max txecloji. Axa xeał yulyibank'inal ti' max jakayi, cax max txecloji yuj can yul is nuk' Jehová, tol ay is may. Yuj c'apax jun cak'ek' puch ow max yatok.
- 17 Max batxbajtek Dios is k'ab ayin tac'al bay satcan tu', axca tol max in yitek Cham bay a' najab miman yich.
- 18 Max in is colcan el Cham bay eb ajc'ul xiwil yip, tol c'am chin is yochej eb, cax yelxac'al tec'an waay eb wintak.
- 19 Max oc bulnaj eb win yet ayin oc yin ok'balc'ulal, palta axa Cham Jehová max oc wetok.
- 20 Max in yican eltek Cham, cax max in yaoncan bay colan. Max in is col Cham, yujtol chin is camc'ulnej.
- 21 A Jehová max yak' in paktzil, atac'ala' in tojolal. Max yak' watx'c'ulal ayin yujtol c'am in mul.
- 22 Yujtol max wikej is beybal Cham, yel wal maj wak' yobc'ulal wion el in ba bay in Diosal.
- 23 A in satak ayic' masanił is cuybej Cham, cax c'amc'al chin el bay is k'anej.
- 24 Watx'c'al in beybal satak Cham. Max in taynej in ba yet c'am chin ayc'ay yin yobtakil.
- 25 Tix wal yuj tu xin, max yak' Jehová paktzil ayin atac'ala' in tojolal, yujtol c'am in mul yul sat Cham.

- 26 Mamin, a mac ikem ayach, chi yunc'al a k'anej bay. Axa mac watx' yochwan, watx' c'apax ochwan bay.
- 27 Watx' a beybal bay mac watx' is beybal, palta cha tx'ox a jelanil yin a tenon ec' nabal eb etnem anima,
- 28 yujtol ach cha col eb ayilwom, cax cheon ay eb lues.
- 29 Mamin Jehová, ach ton ok ak' sakk'inal ayin. Ach in Diosal, ach ok ecan el k'ekk'inal win.
- 30 Yuj a colwal chi wuchcantok eb soldado, cax chin ec'can el yiban murallail conob.
- 31 Yelxac'al tol watx' beybal Jehová Dios. A yalben Cham moj wal tol c'am cabc'ulal yin. Chi colcan el Cham masanil mactxel yipc'ulej yayji Cham yuj.
- 32 Tokwal ay junokxa Dios yintak Jehová. Tokwal ay junokxa colwajwom yintak co Diosal.
- 33 A Dios chi ak'onc'al wip. A Cham chi watx'nen in be.
- 34 Axca bey tx'ucchej, chi yun in bey yuj Cham. Tec'an in waay yuj bay yelxac'al satlak witz.
- 35 A Cham chin k'aytzen yin owal cax chi yak'on wip yin in pakon julbalej tol bronce.
- 36 Ach Mamin chin a c'ubaj, cax chin a coloni. A wal watx'il a c'ul max quin ion aj can.
- 37 Max quin aoc yul jun be lean, yet watx' c'am chin aj jabnajok.
- 38 Max wuktej ec' eb ajc'ul oc win, max ton michchaj eb wuj, cax maj in oc wanajok masantac'al max cam eb wuj.
- 39 Coc'xac'al max wutcantok eb yet watx' manchakxa aj wan eb. A xol wakan max ayc'ay eb.
- 40 Ach ton max ak' wip yet max in ak'wi owal. A eb max caktzaj oc win, max acan oc eb yul in k'ab.
- 41 Ach max a chekcan el eb ajc'ul oc win in satak, a xan max je' wuj in c'ayon el eb c'am chin ocheni.
- 42 Max k'an eb colwal; c'am mactxel max colon el eb. Max yal ba eb bay Jehová, palta maj tak'wok Cham bay eb.
- 43 Max coc'axtok eb wuj, axca wal pokok chi ilaytok yuj cak'ek'. Max in tec'can ay eb, axca wal tec'lay ay tz'otz'ew yulak be.
- 44 Max quin a colcan el bay yowal eb conob, max in acan oc yajawilok mimek conoblak. A eb anima man wojtakok, chin ak'on serbil.
- 45 A yet chi yaben eb wabixal, ikem eb ayin. A eb tx'ok conobal, chi yaoc ba eb yul in k'ab.
- 46 Chi xiwcán aj eb cax chi bilaj eb. Chi eltek eb yul is cuartel.

- 47 Iquis ec' Jehová. ¡Al-layokab watz' k'anej bay in Colomal! ¡Ilayokab can Dios Cham in Colomal yayji!
- 48 Chi paktzej Cham bay eb chin etneni, cax chi yiontek eb conoblak yalan wikbej.
- 49 A Cham chin colon el bay yowal c'ul eb ajc'ul oc win, eb max caktzaj oc win. Mamin, ach ton chin a col bay nak yaxc'ayinak c'ul win.
- 50 Yuj wal tu xin, chi wal watz' k'anej en xol mimek conob, xan chach in bitnej.
- 51 Oj wali xan chi ayc'ay mimek owal wuj ayin rey in, sic'bil in oj ti'. Yinc'al camc'ulalil chach beytok wetok ayin David in ti' c'al yetok winatil yin tojbalk'inal, xi David.

Lajubal k'anej cham rey David

23 ¹ A ton juntzan is lajub k'anej cham rey David ti'

Ayin David in ti', c'ajol in Isaí, max in ilay wal can yuj Cham Axac'al Oco. Ayin ton rey in sic'bil in el yuj co Diosal ayon yinatil Jacob on ti', caw wal watz' in bitni xol eb wet israelal. Chi wala':

- ² Tol chi k'anjab el Yespíritu Jehová win. A is k'anej Cham ayoc yul in ti'.
- ³ A Jehová co Diosal ayon israel on ti', max k'anjab. A Jehová Colomal Israel max alon ayin: A mac chi ak'on yajawil xol anima yin tojola, axca wal chi yochej c'ul Jehová,
- ⁴ lajan wal yili axca wal jilon sakk'inal yet chi sakbi, lajan wal axca yet caw wal c'atxan yet chi ajol c'u, a c'u chi ak'on ch'ib te te' yet chi lajwi yec'cantok nabil k'inal, xi Cham ayin.
- ⁵ Cay c'apax tu' ok yun yak'on Dios is watz'c'ulal yiban eb winatil. Max watz'nej Jehová jun is trato wetok tol c'am lajub, yuj tu' xan c'am bak'in ok uchchajtok. Yuj wal Jehová, xan chi ujc'al wuj, watz'c'al chi yun yion ba tzet yetal chi wochej.
- ⁶ Palta masanil eb yobtakwom, lajan wal ok yun eb axca q'uix ocbil takok, c'am junok mac chi je' c'ul mitx'oni.
- ⁷ Ta ay junok chi yochej chi mitx'on te', yowalil chi k'an junok ch'en ch'en ma junok teal lanza yet chi je' yaontok xol k'ak', axa tz'acantok yin junelnej tu', xi David.

Juntzan soldado cham rey David caw wal jalan (1 Cr 11.10-47)

- ⁸ A ton juntzan winak ti' caw wal jalan xol eb is soldado cham rey David: A ton Joseb-basebet aj Hacmón, a ton satej yayji xol eb oxwan mimek jalan. A wal yet junel max mak' cam 800 winak yetok is lanza.
- ⁹ Axa cham yet is cab xol eb oxwan jalan tu', a ton Eleazar is c'ajol Dodo aj Aho. A' max ayji ec' yetok cham David bay Pasdamim yet max wajban

ba eb filisteo bay tu' yin yak'on eb owal, axa juntzanxa eb israel ayic' bay tu', max el eb. ¹⁰A yet tu' caw wal max tec'baj ba cham Eleazar tu', max mak'layc'al cam eb filisteo yuj, masantac'al max yal c'unbi el is k'ab, max canxac'al lac'an is yespada tu' yul is k'ab. A yet jun c'ual tu' max k'anabax cham yuj Jehová yin yak'on ayc'ay jun owal tu'. Lajwi tu' max tzakloj masanil eb soldado israel yintak Eleazar yuj toj yioncan ec' eb masanil tzet yetal max can yuj eb ajc'ul tu'.

¹¹Axa cham yet is yox, a ton Sama, is c'ajol Age aj Arar. A yet max wajon ba eb filisteo bay Lehi, a bay jun lugar tu' awbil jun awoj axca ubal chi yik lenteja. A bay tu' max elaj eb soldado yet israel. ¹²Palta a Sama max tec'baj ba bay nan xol jun awoj tu', yuj colon elok. Max mak'lay cam eb filisteo yuj. A' max k'anabax yuj Jehová yin yak'on ayc'ay jun owal tu'.

¹³⁻¹⁴A yet junel yet elnak wal wajlay sat awoj, a eb oxwan satej yayji xol eb 30 soldado caw wal jelan, max toj eb bay ayic' cham David bay nach'en yet Adulam. Axa pax eb filisteo xin, a tu' ay is campamento eb bay jobeal yet Refaim. A bay Belén, a tu' ay jun makan eb soldado filisteo. ¹⁵A yet tu' max yalon cham David tzet max yochej c'ul axca ti': Matawal ay mac chi ak'on a' uc'bala' ay bay puertail Belén wuq'uej, xi.

¹⁶Axa eb oxwan soldado caw wal jelan tu', max octok eb bay is campamento eb filisteo, max bet yion eb a' aej ay bay puertail Belén, cax max yiontek eb bay cham David. Palta maj yal c'ul cham max yuq'uej, asan tol max secay bay sat tx'otx' axca junok ofrenda bay Jehová. ¹⁷Max yaloni: Mamin Jehová, ¿tom ok wuc' wal jun aej ti'? Ta chi wuq'uej axcac'al mi tol a is chiq'uul juntzan anima ti' chi wuq'uej, yujtol a juntzan winak ti' yinxac'al ay is mayil max yun bet yion eb a', xi David. Xan majc'alta' yuq'uej.

A eb oxwan soldado caw wal jelan max uten jun ti'.

¹⁸A Abisai is yuʔtak cham Joab, yune' xal Sarvia eb, a ayoc yajawilalok 30 soldado jelan. A yet junel max mak' cam 300 winak yetok is lanza, caywal tu' max yun yion is mimanbilal axca wal eb oxwan tu'. ¹⁹Yelxac'al miman max yun yilay aj can xol eb tu', xan max occ'al can yin yajawilok eb, palta xin, ayto wal maj apnok yintak eb oxwan yet babelal.

²⁰Axa pax Benaía c'ajol Joiada aj conob Cabseel, a jun tu' winak wal tol jelan, xiwil tzet yetal max yunej. A' max mak'on cam cawan soldado caw wal jelan aj Moab. A yet jun c'ual tol caw wal ay sakbacom, max aytok bay jun olan. A bay yul tu' max mak' cam jun no coj c'apaxok. ²¹Max mak'on c'apax cam jun aj Egipto tol caw wal miman is tel. A jun tu' ibil oc jun is lanza. Axa Benaía tu' max toj yin nak tu' yetok jun te', max yion ec' is lanza jun tu'. A yetok is lanza tu' max mak'on camok. ²²A yuj tzet max yun Benaía is c'ajol Joiada ti', xan max yi' is mimanbilal xol eb 30 soldado tol jelan. ²³Caxc'al mimanbil xol eb, palta ayto wal maj apnok yintak eb oxwan yet babelal, palta max yaoc cham rey David yajawilalok eb is taynemal.

²⁴A xol eb 30 jalan tu', a tu' ayoc Asael, is yuxtak Joab, yetok Elhanán, is c'ajol Dodo aj Belén; ²⁵Sama aj Harod, Elica aj Harod c'apaxok. ²⁶Heles aj Palti, Ira is c'ajol Iques aj Tecoa. ²⁷Abiezer aj Anatot; Mebunai aj Husah. ²⁸Salmón aj Aho, Maharai aj Netofa. ²⁹Heled, is c'ajol Baana, ac'ala' aj Netofa. Itai is c'ajol Ribai, aj Gabaa yul yet Benjamín. ³⁰Benaía aj Piratón; Hidai aj tilak aej bay yul yet Gaas. ³¹Abi-albón aj Arba. Azmavet aj Bahurim. ³²Eliaba aj Saalbón, eb is c'ajol Jasén, Jonatán is c'ajol ³³Sama, aj Harod. Ahíam is c'ajol Sarar, aj Harod c'apaxok. ³⁴Elifelet, is c'ajol Ahasbai aj Maaca, Eliam is c'ajol Ahitofel aj Gilo. ³⁵Hezrai, aj Carmel. Paarai, aj Arba. ³⁶Igal is c'ajol Natán aj Soba. Bani aj Gad. ³⁷Selec aj Amón, Naharai aj Beerot, yikomal yarma Joab is yune' xal Sarvia. ³⁸Ira aj Jatir. Gareb aj Jatir c'apaxok, ³⁹c'al Urías hitita. 37 eb ti' yin masanil.

Yinak aj cham rey David bisil conob

(1 Cr 21.1-17)

24 ¹Max tit yowal Jehová yin conob Israel, max yaon oc Cham yin is nabal cham rey David tol chi yila' jantak bisil eb israel c'al eb aj Judá. ²Max yalon cham rey bay Joab, yajawil eb soldado ayoc yetok cham: —Ec'an xol masanil is tribual israel, chi tittac'al bay Dan masantac'al bay conob Beerseba, cax cheon aj is bisil eb anima, axca tu' ok yun wojtakneni jantak anima yin masanil, xi bay.

³Cax max tak'wi Joab:

—Mamin rey, aokab Jehová co Diosal chi ion aj can bisil eb anima, cien elto ec'ban yintak tinani', cax oktoc'al ela', palta xin, ¿tzet wal yuj xan chochej chi aj is bisil eb anima ti'? xi Joab.

⁴Palta max tenxac'al oc cham rey yiban Joab yetok is yajawil eb soldado tol chi ilay aj bisil anima. Yuj tu' max eltek eb satak cham rey, max yiken eb toj bay max al-layi. ⁵A yet max ec'cantok eb bay yul a' Jordán max watx'nej aj eb is campamento bay Aroer bay tz'eyil ec'tok conob bay jobeal Gad, max lajwi tu' cax max toj eb bay Jazer. ⁶Lajwi tu' max toj eb bay Galaad c'al bay k'axanil tx'otx' chi yik Hodsi. Lajwi tu' max toj pax eb bay Dan, catatu' max meltzoy eb tilak yet Sidón. ⁷Max toj pax eb bay miman conob Tiro bay is conob eb heveo, yetokc'al is conob eb cananeo. Lajwi tu' max toj eb bay conob Beerseba bay Néguev yul yet Judá. ⁸Max lajwi yec' eb bay yul is nación tu' masanil, yinx baloneb xajaw yetok junc'al c'u, catatu' max meltzoy eb bay Jerusalén. ⁹Max yak'on Joab bisil eb anima bay junjun conob bay cham rey: 800 mil winak tol tiempo yoc yin owal bay israel, ay pax 500 mil eb nak bay Judá.

¹⁰Max lajwi yion cham rey David is cuenta yin jantak anima bay yul conobal, cax max oc yin bilc'ulal, max yalon bay Jehová axca ti':

—Caw wal max oc in mul yuj jun max wun ti'. A wal tinani' Mamin Jehová, chin tewi wal ayach tol cheil jun in mul tu' wiban, caw wal yob tzet max wun chi wabej, xi cham rey David.

¹¹Axa yet max sakbi aj yet junxa c'ual, max yalon Jehová bay Gad is chekbej, aom oc nabalej c'apax yayji bay cham rey David: ¹²Asi', al bay David: Axca ti' yalon Jehová: Oxeb tzet yetal ok waltej ayach, cax ok a sic'leni baytal ay junok ok ochej, cax ok wak'oni, xi Jehová, cachi.

¹³—Inye, xi Gad, cax max ul yalon bay cham rey David axca ti':

—¿Chi mi je' a c'ul chi jay ukebok abil wajil bay yul a conob ti'? ¿Ma chi cha' a c'ul chak' elilal oxebok xajaw bay eb ajc'ul oc en? ¿Ma a oxebok c'ual ilya' cax chi cam anima yul a conobal ti'? Na' wal xin, cax ok aloni. Lajwi tu' ok tok walon pax bay Jehová Cham max in chekontek, xi bay.

¹⁴Axa max yun yalon cham rey bay Gad:

—Caw wal chi somchaj in c'ul tinani' yuj tzet chi wut waloni. Watx' chon ayc'ay yul k'ab Jehová, mimanokab is cusc'ulalil Cham jin, manokabnak yul k'ab eb anima chon ayc'ayi, xi.

¹⁵Yuj tu xin yet-xac'al jun k'inibalil tu', max yatek Jehová jun owal ilya' yiban israel, masantac'al max tz'aknaj c'ual max al-layi. Yuj tu' max cam 70,000 anima bay yul masanil nación tu', max tittac'al bay Dan masantac'al bay conob Beerseba. ¹⁶Axa wal yet max yaontok jun ángel is k'ab yiban Jerusalén yet chi yak' lajwok eb anima bay tu' yaloni, max cusc'ul Jehová yuj tzet max uj tu', xan max yal bay jun ángel tu': K'okbilxa tu', ocan waanok, xi Jehová.

A wal tu' ayic' jun ángel tu' bay tec'bal trigo yet Arauna jebuseo. ¹⁷A yet max yilon cham David jun ángel chi ec' ak'on lajwok conob tu', max yalon cham bay Jehová:

—Ayin ay in mul, ¿tzet wal is mul juntzan eb anima ti'? Chin k'an ayach tol a wiban yetok yiban winatil chi oc jun miman yailal ti', xi.

Watx'nebil aj jun altar yuj cham rey David

(1 Cr 21.18-27)

¹⁸A yet jun c'ual tu' max jay Gad ul yalon bay cham David:

—Ajantok bay tec'bal trigo yet Arauna jebuseo, cax cha watx'nen junok altar bay Jehová, xi bay.

¹⁹Cax max toj cham David axca max yun yalon Gad yuj Jehová. ²⁰Max yilontek Arauna tol lanan yapni oc cham rey yetok eb is chekbej tol t'inan chi yuttok ba eb bay ayic'ok, xan max ay nojan sat tx'otx' satak cham. ²¹Max yalon Arauna:

—¿Tzet wal yuj xan chach jayoc ayin mamin rey? xi bay.

Max tak'wi bay:

—A yuj in manon jabok lugar bay a tec'bal trigo ti', cax ok in watx'nen aj junok yaltar Jehová cayti', yet watx' ok oc wanaj cam anima bay yul conob ti', xi cham David.

²²Max yalon Arauna bay cham rey David axca ti':

—Yunokab mamin, watx'nej, cax chak'on xajanbal bay Jehová, axca wal chi yochej a c'ul. Ay no wacax chi je' ak'on yin xajanbalil cayti'; ay te

mak'bal trigo c'al te yugo chi je' yoc te' yin sial. ²³Ayin ti' chi wak' masanil juntzan ti' ayach. ¡Chok wal el yin c'ul Jehová ok cha yab tzet ok ala! ħi bay.

²⁴Max yalon cham rey bay Arauna:

—C'amak, tol chin man masanil juntzan tu' ayach, yujtol maj je' wak'on bay Jehová co Diosal tzet yetal tol man wetok, ħi cham David.

Yuj tu' max man cham jun lugar bay tec'bal trigo, yetokc'al no wacax yin 50 siclo plata ch'en tumin. ²⁵Max watx'nen can aj cham David jun altar bay Jehová bay tu', cax max yak'on tz'a xajanbal c'al xajanbal yet junc'ulalil bay Cham. Catatu' max yun yaben Jehová tzet max k'an yuj camich chi uj yulak conob Israel, cax max oc wanaj ilya' tu'.